

## SAN PABLO KARTA ROMA ÇXHABTEWE'SX JÏI

### *Romatewe'sxtxi Pablo weçxana fxi'jni*

<sup>1</sup> Adxa' Jesukristo's selpisáa Pablo yaaseth. Aça' adxa's Dxusku txhitçxa nvxiht, Kristo yuwe ewte nvxiitwa'jsa's pta'sxkahn.

<sup>2</sup> Dxusa' txãa yuwe ewte nvxiitwa'jsa's pta'sxni yuuna jïna kfxi'ja'kh nyafxii entey Dxusna selpisaawe'sxtxi.

<sup>3</sup> Aça' txãa Dxus yuwe ewte nvxiitwa'jsa' kwe'sxtxi jxpe'jsa Jesukristo Dxus Nçxi'ka'sku we'we'. Aça' Jesukristo' naa kiwete yu' jxkaahsa Davxid ji'thek upx kakwe yu'.

<sup>4</sup> Nawa kïhtewa jxuka ãjawa'jsa Dxus Nçxi'ktewa Dxus Espiritu' kwe'sxtxi kaajiyu'kh Jesukristo's uuniijũ itxi vxitçxa.

<sup>5</sup> Sa' adxa's peeygãhçxa Jesukristo nwe'wete', Dxus txhitxnisath yuu, Jesukristo's selpiwa'jsa, kxah naa kiwete maa nasawa Jesukristo's jiyuçxa jxpa'gatxna txã'sna nwëese'jya'.

<sup>6</sup> Aça' i'kwe'sxwa Jesukristo's jiyuçxa ne'kwe jxpa'ga, Dxusa' petx i'kwe'sxne' txhitxh Jesukristo tasxte pa'jwa'jsa txãa pa'ga nwëese'jna ũsi'kwe.

<sup>7</sup> Açxha' Roma çxhabtewe'sx i'kwe'sx jxukaysa jïi naa karta's fxi'jçxa kajaçthu, i'kwe'sxa' Dxus peeygãhçxa txhitxnisai'kwe txãa yakh fxi'zesa. I'kwe'sxtxi' Dxusa' pu'çxhina vxite' kwe'sxtxi

jxpe'jsa Jesukristo, txãa pa'ga Dxus yakhçxáa mfxi'zewe.

*Roma çxhabna Pablo u'j wēeni*

<sup>8</sup> Jesukristo i'kwe'sxtxi pu'çxpa'ga Dxus yakh i'kwe'sx ew fxi'zeni's mteewa jxukatx ew we'we', txãa pa'ga adxa' Dxusa'sthi weçxá'.

<sup>9</sup> Sa' na'wē Dxusa's nakwe wala selpi'th txajx Nçxi'k kaapiya'jni's ũusuh jxuka yajkxna txãa Dxusa' jiia' adxa' i'kwe'sx pa'gate bagaçxtewa txãa yakh puutx we'wena nes yuusaatewa.

<sup>10</sup> Txãasath i'kwe'sx tasxna yuhwaça' sũhçxa Dxus yakh puutx we'wena nes yu'.

<sup>11</sup> Sa' kxtee pa'jçxa' Dxus yakh fxi'zewa'ja's i'kwe'sxtxi pu'çxhi'nja sũju'th, jweeíçxáa çxhãçxha fxi'zekahn.

<sup>12</sup> Sa' puutx kxteeçxah ya'pu'çxna Dxus yakh çxhãçxha fxi'zewa'ja's ji'phu'nja'w, txãa pa'gatey i'kwe'sxwa Dxusa's yaakxsa i'kwe adx na'wēy.

<sup>13</sup> Yakthē'jwe'sxtxi pta'sxi'th: i'kwe'sx yakh puutx uyya' yuwe'nja sũhna maz uswa yajkçxawa, açxpkaçx yujxa' yu' tudunimeeth. I'kwe'sx ksxavxysu Dxus luuçx yuua'jsa ũstxna txãatx Dxus jii knayya' yuwe'nja sũju'th, ma'wētka vxite kiwesuwa Dxus jii knay txã'wēy.

<sup>14</sup> Adxa' maa nasatxwa jxuka Kristo yuwe's pta'sxwa'j ji'pthu, çxhabtewe'sx ma'tx yuu, fxiy we'wesa ma'tx yuu, naa kiwete wala jiisa ma'tx yuu meeçxa' jiimeesa ma'tx yuu nawa ma'wēsaxwa jxuka pta'sxwa'j ji'pthu.

<sup>15</sup> Txãasa adxa' Kristo yuwe ewte nvxi-itwa'jsa's pta'sxya' yuwe'nja sũhnaçxáa ũsthu Roma çxhabte i'kwe'sxtxiwa.

*Kristo' maatxwa jxuka nwe'wewa'jsa'*

16 Adxa' Kristo yuwe ewte nvxiitwa'jsa's pta'sxya' weh yuhwa thaame'çmeeth, txãa pa'gatey Kristo' Dxus kaahnisa' maatxwa nwe'weya' ãjawa'jsa txã'sna ũuste jxpa'gasa yuutxi', judiu ma'tx yuu judiimeesa ma'tx yuu nawa maa nasatxwa jxuka nwe'wewa'jsa'.

17 Aça' nwe'wenisa yuuya', Kristo's ũusuh jxuka yajkxçxa jxpa'gate yuuçxáak Dxus dxi'pte yuuwemée ewsa yuuna ya'pa'ja'. Txã'wē yu-uwa'ja's Dxus librute vxite ajkhēwa na'jīnak pta'sxi': Dxusa's ũusuh jxuka yajkxte yuuçxáa Dxus yakh fxi'zewa'ja's ya'ji'phuna jī'k.

*Naa kiwete nasa' yuuwesata'*

18 Dxus kastigo seena'sa cieluju yuja' nasa ewmeesa jxukaysawe'sx jīi, txãawe'sxa' ewmeete yuuçxáa fxi'zena isasa yu'sa' yupna ũsta' naa pa'ga.

19-20 Txãa ente' Dxus ma'wēsatewa jiimeetha'w yu' jīya' ãjameetxna, txãa pa'gatey Dxus ma'wēsatewa kaajiyu'jsa ũsta' Dxus pheu'jçxa nvxiitnisa txãatx kaajiyu'ju'. Txãa pa'gak naa kiwe's pheu'jçxa nvxiitnijū' ew ya'jiyu' Dxusa' kīhtewa jxuka ãjawa'jsa bagaçxtewa nes yuupa'jsatewa. Aça' txãa ma'wēsaçxawa kaajiyu'jnku txã'wē pheu'jçxa nvxiht.

21 Txã'wē Dxusa' ũsyuhna sūhwa'j yu'sa' ji'phuçxawa, isate yu' Dxusa's weçxana nwēese'jmée, naa kiwete kīh yuhwa seelpimeesaçxá'stxi pakwena jxã'j. Aça' txã'wē yūupa'ga txãawe'sx ũusa' naa kiwete ewmeesa yuuçxá'sku yaakxwa'jsa neeyūu.

22 Txãawe'sx yu' jiitha'w jĩ'tx, nawa jiimeesatx yuuna paj.

23 Txã'wẽ Dxus bagaçxte yuhwa pçuwa'jsamée kĩhtewa jxuka ãjawa'jsa' txã'sna neewe'wepkaçxte, naa kiwete pçuwa'jsa nasa na'wẽ piisaçxatx neewe'wena ũsu'. Sa' txã'wẽçxáa yũumée, fxuusá, yu'kh eçx txã'wẽsa na'wẽ vxitçxatx neewe'wena ũsu'.

24 Txã'wẽ yũupa'ga Dxusa' txãawe'stxi' pu'çxmée nvxihtku, peekx ewmée kazx yaakxniçxá's kxtey yuuna fxi'zekahn, kxahtx kĩhwa thaampa'saçxá's puutx ya'ewmée yũuna fxi'ze' teeçxsa na'wẽçxah.

25 Txãawe'sxa' isa Dxus ãtxisa yu'sa' jxpa'gaya' wa'lçxa, Dxusmeeçxá'stxi jxpa'ga. Txãasatx wejxwa Dxus kĩhnawa jxuka pheu'jçxa nvxiit-sa'síi neewe'wepkaçxte, naa kiwete Dxus pheu'jçxa nvxiitnisaçxá'stxi neewe'wena fxi'ze'. Txã'wẽ Dxus bagaçxtewa pçuwa'jmeesa's neewe'wewaç, wejx thaakwe ewsa', nawa txã'wẽ yũumeeta'.

26 Txãa pa'ga Dxusa' pu'çxmée nvxihtku, txãawe'sx ewmée kazx yaakxniçxá's kxtey yuuna fxi'zekahn. Aça' u'y pwe'stxi pkal yuuna fxi'ze', txãawe'sx kakwe'síiçxáa suwwa'jsana pakwena.

27 Txã'wẽy piçthẽ'jwe'sxwa nyu yakh zhiçxkwe fxi'zeni yu'sa' nvxihtçxa, puutx piçthẽ'j pwe'stxi pkal thaampa'saçxá's kxtey yuuna fxi'ze', peekx kakwe kazx yaakxniçxá's nwẽese'jna. Txã'wẽ yũuçxa peekx kakwejũjçxáa ya'kastigãywa'ja's uyu'tx.

28 Txã'wě Dxusa's nwēese'jya' wa'lyã'the', Dxusa' pu'çxmée nvxihtku, txãawe'sx kazx yaakxniçxá's nwēese'jçxa peekx ma'wēwa ewmée yūuna fxi'zekahn.

29 Txãa pa'gatx ewmeesa yuuçxáa yuuna pa'j: pthãawesa, pkal yuunisa, ewsa's jiiçxawa ewmeeçxáa yūusáa, Dxus yu's yajxnmée ji'phu wēeniçxá's yaakxsa, kīhwa ewmeeçxáa yūusáa, vxitetx açeyaakxsa, nasa ikhsa, puui kiissa, ĩsxiisa, ewsa yu'sa' weeçxsa, ĩsxiiçxa kaapui'jsa, txã'wěçxáa yūusaata'.

30 Vxitetx ewmée nuywe'wesa, Dxusna açesa, puutx ya'wēesxusá, peekiçxáa iiwejçx yaakxsa, vxitee dxi'pte iiwejçx we'wesa, ewmée yūuwa'j u'sesa pakwena fxi'zesa, neywe'sxtxi nwēese'jsamée,

31 ewsa's jiyuya' wa'lsa, puutx we'weni's kxtey yuusamée, kim yuhnawa peeygãasamée, багаçxte yuhwa yuwe ewuusamée, kim yuhnawa pu'çxsamée.

32 Txãawe'sxa' wala ew jiita' txã'wě ewmée yūupa'ga Dxus kastigote uuwa'ja's. Txã'wě ew jiiçxawa, ewmeesa yuuçxáanatx kxtey yuuna fxi'ze'. Sa' ũus yuhwa ji'phmeesa yã'tha', txãasatx vxitesa ewmée yūuçte uyçxa', wejxwa kçxhãaçxha'jna fxi'ze'.

## 2

### *Dxusa' isak kastigaĩ*

1 Txã'wě ewmée yūupa'ga Dxus kastigo's jxpa'gawa'j ji'phta' jña idxa' açewe'weçxawa,

txãa nasa ewmeesa na'wẽ fiçxáag ewmée yũuna fxi'ze' makwe Dxusa's jiiçxawa.

<sup>2</sup> Peekx jiitha'w txã'wẽ ewmée yũusatxi's Dxusa' isak kastigaĩ' maatzwa jxuka.

<sup>3</sup> Aça' idxa' txã'wẽ vxitetx açewe'wena Dxus kastigo's jxpa'gawa'j ji'phta' jĩçxawa idxwa txã'wẽyçxáa ewmée yũuçxa', Dxusa' idxa's kastigaĩmeena ¿sũju'gá'?

<sup>4</sup> Txã'wẽ ewmée yũutewa Dxusa' peeygãhçxa ãçxhíi yu' kastigaĩmée ũsa'. Nawa txãa yu' idx ewmée yũunitx nvxihtçxa txajx tasxte sxawed-kahn ũythasna iipe'ja'.

<sup>5</sup> Txã'wẽ ũythasna ũstewa, iidx ewmée yũunitx nvxihtçxa Dxus tasxte sxawedwa'j yu'sa' yaaki'çmeeg. Txãa pa'ga ya'kastigãywa'ja's jweeĩçxáa nuywalana ũsgu, nmeh ente Dxus kastigãywa'j en ãhtewe'sx.

<sup>6</sup> Txãa ente' ma'wẽ yũusaçxawa, teeçxsa na'wẽçxah jxpa'gatzna txãawe'sx jĩ's:

<sup>7</sup> багаçxte yuhwa pçuwa'jsame's een isa pakwena ewçxáa yũuna fxi'zesa' pçumée itxi fxi'zewa'ja's jxpa'gatzna.

<sup>8</sup> Naapkaçxha' Dxusa's ahçena txajx jxkaahni yu'sa' kxtey yuumée ewmeeçxáa yũuna fxi'zesa' Dxus kastigo seena' yuhsa's jxpa'gatzna.

<sup>9</sup> Maawa ewmeeçxáa yũusa yuutxi's jxuka kastigãywa'j en pa'jana, judiu ji'jmée vxite nasatx yuhwa kastigãyçxa', judiuwe'sx yuutxi' wejx txã'wẽ kastigaĩna.

<sup>10</sup> Nawa maawa ew yũuna fxi'zesatxi's Dxusa' ũsuna txãa yakh wēt weçxana fxi'zewa'ja's, judiuwe'sxtxi ũsçxa', judiu ji'jmée vxite nasatxwa

txã'wēyçxáa ũsuna.

<sup>11</sup> Txãa pa'gatey Dxusa' teeçxsaçxáan jxthaakwe ew jxpe'je'çme', jxukaytxi txãa na'wēçxaçxáak jxpe'je'.

<sup>12</sup> Moises leya's jiimeesawa ewmée yũuna fxi'zesa yu' jxukaysa vxituwa'jsa iïçxáata'. Aça' makwe Moises leya's jiiçxawa ewmée yũuna fxi'zesa yu' txãawe'sxwa jxukaysa vxituwa'jsa iïçxáata', txãa leya's nwēese'jmeeçxa ewmée yũupa'ga.

<sup>13</sup> Txãa pa'gatey leya's jiipa'gaçxáa ewte ya'neeyũ'çme', aça' makwe leya's jiimeeçxawa ley jxkaahnitx kaavxya'ja'jsa yuuçxáa yuuwemée yuuwa'jsata'.

<sup>14</sup> Aça' judiu ji'jmée vxite nasa makwe leya's jiimeeçxawa ley jxkaahni Dxus kaaũusuthe'jni's kaavxya'ja'jtx ewmeesa yuutxi' nwēese'jméeh ewsaçxá's kxtey yuuna.

<sup>15</sup> Txã'wē yũuwa'ja's Dxusne' kaaũusuthe'je', txãa pa'gatx áate kaavxya'ja'jna ewçxáa fxi'ze'. Txã'wē yũuwa'ja's txãawe'sx ũus yaakxni' kaa-jiyu'ju'ne' kĩh yũuni ewmeesatewa sa' kĩh yũuni ewsatewa txã'wēy.

<sup>16</sup> Aça' Dxus kaahni Jesukristo kĩhçxa', nasaa ũusteçxáa yaakxni's jxuka áate kaajiyu'juna txã'wē yũuwa'ja'sthu adxa' pta'sxi'.

### *Judiuwe'sx Moises leya's ji'phsa*

<sup>17</sup> Nawa idxa' na'jĩ'g: judiuth, txãasa Moises leya's ji'ptha'w. Txãa pa'ga Dxusa's jiisath jĩçxa iïweçxgu yaaki'.

<sup>18</sup> Dxus jxkaahni's jiisag, Dxus leya' kaapiya'ja'k ewsaçxá's txhitxwa'ja's.

19 Yafx ji'phmeesatx jxpe'jsath jĩ'g, sa' çxhi'dxte fxi'zesatxwa eena'te kutxi'jsath jĩ'g.

20 Sa' ley ji'ptha'w kxteea' ma'wẽ fxi'zewa'ja'swa pta'sxi'k ewsaçxáana kxtey yuuwa'ja's jĩ'g.

Txãasag ma'wẽ fxi'zewa'ja'swa kaajiyu'jsath jĩ'. Sa' pxthaakwesatxwa pta'sxsath, txã'wẽ yuuya' iıçxáa leya's ji'ptha'w jĩ'g.

21 Txã'wẽ vxitetx kaapiya'jaççxa', idx yu' çkĩh yũuçxaga piya'çmée? Idxíiwa pta'sxçxa': Pesweewa'jme' jĩ'g sa' idx yu' çkĩjxa'ga peswé'?

22 Idxíi we'weçxawa: Ptamsayã'ja' vxitesa yakh pkal yuuwa'jme' jĩ'g sa' çkĩh yũuçxaga idx yu' kxtey yu'çmée? Idxíiwa Dxus itximeesatxi's açe'g sa' çkĩjxa'ga Dxus itximeesatx peswé'?

23 Dxus leya's ji'ptha'w sũhna iiwejçxgu yaaki', nawa txãa ley jxkaahni's jxuka nwẽese'jmeeçxa', Dxusa's açesag.

24 Aça' Dxus librute' isa yuh we'we'k na'jĩna: judiu ji'jmée vxite nasa' Dxusa's açewe'we'tx, nawa yuuwesa yu' i'kwe'sxi'kwe jĩ'k.

25 Æçxha' na'wẽ yũunisa's pta'sxya'wath: Moises leya's nwẽese'jna kaavxya'ja'jaççxa yu', cirkuncidãyni's jxpa'gawa'j yuja'. Nawa ley jxkaahnitx jxuka kaavxya'ja'jaçmeeeçxa ya'cirkuncidãyte', cirkuncidãynimeesanpa iıçxá'.

26 Aça' cirkuncidãynimeesaçxawa leya's jiisa na'wẽ ew yũuwa'ja's kxtey yuute yu', cirkuncidãyni na'wẽysa iıçxá'.

27 Mpa'yajkxwe. Txã'wẽme' cirkuncidãynimeesaçxawa, ley jxkaahnitx



kaavxya'ja'jsa yu' cirkuncidāynisawe'sxtxi ewmeekhē nvxiitutxna, makwe leya's ji'phçxawa jxkaahni's jxuka kaavxya'ja'ja'çmeeçxa ya'cirkuncidāyte'.

28 Txā'wē yuwejuçxáa judiuth jīsa judiu ya'yu'çme', sa' txā'wēy kakweteçxáa cirkuncidāyçxa judiu ya'yu'çme',

29 naasáa ũusuh jxuka Dxusa's yajkxna ew fxi'zeteçxáak judiu na'wē yuh yuuna ya'pa'ja'. Sa' ewmée ũus yaakxni's yu'pthehnisaçxáa cirkuncidāyni na'wē. Aça' txā'wē ewmée ũus yaakxni's yu'pthehsa yuuçxá'sku Dxusa' weçxá'.

### 3

1 Txā'wēte', judiuçxáa ¿kīh wejx thaakwe ewsa ji'phtxna? Sa' ya'cirkuncidāyni' ¿kīhtega selpi'?

2 Txāawe'sxa' ewsa yu'sa' wala ji'phta'. Txāasaí kīhtewa thaakwe ewsa Dxus yuwe's ji'phta' txāawe'sxtxi neewe'weçxa nvxiitnisa's.

3 Txā'wē Dxus yuwe thaakwe ewsa's ji'phçxawa judiuwe'sx maái yu' Dxus yakh fxi'zewa'ja's kxtey yuumeete', ¿kīh yuuxk? ¿Txā'wē kxtey yuumeeteçxáa ¿Dxuswa kīhtewa jxuka pu'çxya' puutx we'weni's pu'çxmée yuuma'k?

4 Txā'wē yuumeena. Makwe naa kiwete nasa' Dxus yakh fxi'zewa'ja's kxtey yuumeetewa, Dxus yu' txajx pu'çxya' puutx we'weni's kxtey yuuna. Dxus txā'wē kxtey yūuwa'ja's we'weçxa', Dxus librute na'jī'k:

Txāa ente kxtey yuuni's uyçxa',

Īsxiimée isa yuh we'wesa yu'ga jītxna jī'k.

5 Kwe'sx ewmée yūunisa' selpi'k txā'wē ewmée yūute ičxáak Dxusa' txajx peeygāani's jweeíçxáa āate kaavxya'ja'ja'. Txāa pa'ga ewmée yūunisa' seelpisa', Dxus peeygāani's kaavxya'ja'jsa jī'tx maaíi yu'. Txā'wēte', kwe'sx ewmée yūuni's ¿ma'jītka'w? Kwe'sx ewmée yūunisa' seelpisate', Dxusa' ewmée yūusatxi's kastigāyçxa', ¿Dxuswa ewmée yūusaçxa ma'k txā'wē yūu?

6 Weh yuhwa ewmée yūusame'. Dxusa' ¿ma'wē naa kiwete nasa yuuwesatx kastigāyya' ājakx, txāaíwa ewmée yūusaaçxá'?

7 Txā'wē adx ewmée yūunisa Dxusa's kxtey kxu'ju'jna selpiičte', ¿adxa's kījxa'çxáa ewmeeg yūu jīna we'weçxa kastigaĩkx?

8 Txā'wē yaakxsa': Ewmeesaçxá's wejx pa'pçxute ewna, ewsa vxyaana nes yuukahn jī'tx. Txāa yu' adxa's açesatx txā'jī': Pablo' txā'wēk kaapiya'ja' jīna. Txā'wē we'wesa' Dxus kastigo yuuçxá's jxpa'gawa'jsata'.

### *Jxukay yuuwesatha'w*

9 Na'wē' aça' ¿judiuwe'sxçxáa kīh yūuçxa vxite nasate jxthaakwe ewsa yuukxtha'w? Weh yuhwa thaakwe ewsameetha'w. Txā'wē judiuwe'sxçxáa thaakwe ewsatha'w sūhwe'sxte kaa-jiyu'juçthu: judiu ma'k yuu vxite nasa ma'k yuu nawa jxukaysa ewmée pkalsaçxaçxáatha'w.

10 Txajíik Dxus librutewa na'wē we'we': Teeçxçxáa yuhwa ewsa yu' meeta'.

11 Kim yuhwa Dxusa's jiyuçxa pakweya' yaakxsameeta'.

12 Jxukaysa jxpubaçxa vxituni ūsta'.

Txãasa ew yũuwa'j yu'sa' teeçxçxáa yuhwa yaaki'çmeeta' mteewe'sxçxáa yuhwa.

13 Txãawe'sx we'weni' uusáa pedani kafxa's phadeni na'wẽ kazxsata'.

Sa' txãawe'sx thune' ul weeswée weneno na'wẽ ikhsa', ãsxiina kaypuba'jçxa.

14 Seená' kazx ewmée we'weni' yuuçxá's ji'phta'.

15 Txãawe'sx çxida' nasa ikhya' u'jwa'ja's yuuçxáatx selpi'.

16 Vxitetx nxuste kaafxi'ze'jwa'ja's yuuçxáatx ya-jkxna fxi'ze'.

17 Ewte kaafxi'ze'jwa'j yu'sa' yaaki'çmeeta'.

18 Dxusa' uyna ũsna sũhna ũukhwa'ja's yu' ji'phmeeta' jĩ'k.

19 Dxus librute na'wẽ ewmeesata' jĩna we'we'k txãa yu' Dxus leya's jĩisawe'sxtxi we'weçxak txã'jĩ'. Aça' txãawe'sxa' Dxus yakh pdxi'puwa'j en ãhte', yuuwemeesatha'w jĩna pasya' ajameetxna kim yuhwa.

20 Txãa pa'gatey leya'sçxáa yajkxte', maa yuhwa yuuwemée ewsa ya'yu'çme', leya' naasáa kĩh txã'wẽ ewmeetewa txã'sna pta'sxsaçxá' naa pa'ga.

### *Yuuwemeesa yuuya' Kristo's jxpa'gawa'ja'*

21 Aça' ley jxkaahni's nvxihtçxa yuuwemée ewsa yuuna pa'jwa'ja's açxha' Dxusii kaajiyu'kh, txã'wẽ yũuwa'ja's Dxus leyte txãniiteyku pta'sxna fxi'jni ũsu' Dxusna selpisaawe'sx fxi'jni.

22 Txã'wẽ yuuwemée ewsa yuuna pa'jya', naasáa Jesukristo yuuçxá's ũusuh jxuka yaakxwa'ja', nasa ma'wẽsawa jxuka.

23 Txã'wěme' maa yuhwa ewsamée, jxukay pkalsaçxaçxáa yuuna pa'jçxa Dxus tasxte pa'jwa'ja's ji'phmée ũsta'.

24 Txãa pa'gak Dxusa' peeygãhçxa txajx tasxte yuuwemée ewsa yuuna pa'khan, Kristo Jesusa's uuwa'j vxit kwe'sx yuuwesatx nwe'wekahn.

25 Aça' Kristo txã'wě kluuste uuniijūk Dxusa's yaakxsa txãniiteywe'sx pkal peltunãynimée ũsu'ne'ta txãa pkaltxi Dxusa' peltunãy, aça' txajũtx yuuwemeesa jĩni yuu.

26 Sa' naa ensuwe'sx pkaltxiwa txã'wěyçxáak Dxusa' txagaçxhíi Kristo kluuste uuniijũjx peltunãyçxa nvxiht, yuuwemeesa yuukahn maawa Kristo's jxpa'gawa'jsa yuutxi'.

27 Aça' ¿kĩh yuupa'ga kwe'sxçxáa ewsatha'w sũhna weeçx yaakikxtha'w? Txã'wě yaakxwa'ja' pçuk. ¿Kĩh yuupa'gaga iiwejçx yaakxwa'ja' pçu? Jesusa's ũsuh jxuka yajkçxçxa jxpa'ganisa yakha', iiwejçx yaakxwa'j kaseje'çme', txãa pa'gak iiwejçx yaakxwa'ja' pçu. Txã'wěme' nyafxíi yu' ley jxkaahnitx kxteythu yu' sũhte', iiwejçx yaakxwa'jçxáak kaseje'.

28 Txãa pa'ga jiitha'w ley jxkaahni's nvxihtçxa, naasáa Kristo yuuçxá's ũsuh jxuka yajkçxçxa jxpa'gateçxáa, yuuwemée ewsa yuuna ya'pa'ja'k nasa ma'wěsawa jxuka.

29 Dxusa' judiuwe'sxçxáatx pu'çxçxa', judiu ji'jmée vxite nasa yuutxi' pu'çxwa'jsamée wána açne'kwe i'kwe'sxçxáa iiwejçx yaaki'. Txã'wě yuumée judiu ji'jmée vxite nasatxwa pu'çxwa'jsaíçxá'.

30 Teeçx Dxusçxáa jxukaysawe'sxtxi

pu'çxwa'jsa', cirkuncidãynisaçxawa Jesusna ùusuh jxuka yajxna jxpa'gateçxáa yuwemeesa ya'yuuna. Sa' txã'wěy cirkuncidãynimeesaçxawa Jesusna ùusuh jxuka yajxna jxpa'gateçxáa yuwemée ewsa ya'yuuna.

<sup>31</sup> Txã'wě Jesusna ùuste jxpa'gawa'jçxá's pta'sxçxa', ley yu' pu'çxwa'jsame' jĩçxa txã'jĩ'çmeetha'w, wejxwa ley jxkaahni's kxtey yuuwa'ja'stha'w pta'sxi'.

## 4

### *Abrahana' na'wěk yuu*

<sup>1</sup> Kwe'sx yaçgawe'sx Abrahana's ùus miiya-jkxwe wakx: Txã' çkĩhga yũu yuwemeesa yuuna pa'jya'?

<sup>2</sup> Abrahana' kĩhçxáawa yũuçxa txã'wě yuwemée ewsa yuuna pa'jwaça', txã'wě yũuçxath ewsa yuuna pa'j sũhna iiwejçx yaakxwa'ja's ji'phuwa'j ne' yu'. Nawa kĩhwa yũumeeçxak ewsa yuuna pa'j, naa pa'ga iiwejçx yaakxwa'j ji'phmeek yu'.

<sup>3</sup> Txajjik Dxus librute pta'sxçxa': Abrahana' ùusuh yuuçxáak Dxusa' kxtey yuuna sũhna yajkx. Txã'wě yaakxpa'gaçxáa ewsa yuuk jĩ'k.

<sup>4</sup> Peekx jii i'kwe: Kĩhçxáawa mjĩipa'ga dukhnisa' peennisame'; txã' mjĩipa'ga dukhnisa', yuula's dewenisa'.

<sup>5</sup> Nawa kĩh yuhwa yũumeeçxawa, naasáa pkalsatx nwe'wesa Dxusa's yuuçxáa ùusuh jxuka yajkxteçxáa, Dxusa' txã'sa' yuwemeesak vxitu'.

<sup>6</sup> Txajíik kíh yuhwa yũumeexawa yuumeesa yuuxxa weçxana fxi'zewa'ja's Davxida' we'we na'jĩna:

<sup>7</sup> Yuuwemeesag jĩna Dxusa' we'wete',

Yuuwemée neeyũusaawe'sxa' weçxanatz fxi'ze'.

<sup>8</sup> Maanawa txãawe'sx pkaltxi khũkhte', weçxana fxi'zetxna jĩ'k.

<sup>9</sup> Na'wě weçxana fxi'zewa'ja's pta'sxi'k txã' ¿cirkuncidãynisawe'sx jĩiçxáa wána, meeçxa' cirkuncidãynimeesawe'sx jĩi yã'jçxa wáanax? ¿Maa sũju'kwe? Ew jiyuya' Abrahana's miiya-jkxwe. Txã' ũusuh yuuxxáa Dxusa's yaakxpa'ga yuuxxáak yuuwemée yuuna pa'j jĩ'k.

<sup>10</sup> Aça' Abrahana' ¿bagaçxga txã'wě ewsa yuuna pa'j? ¿Cirkuncidãynijũ', meeçxa' cirkuncidãynimey wá' yuuwemée ewsa yuuna pa'j? Ew jũitha'w cirkuncidãyni yuumeyku yuuwemée ewsa yuuna pa'j. Txãa e'suk Abrahana' cirkuncidãyni yuu.

<sup>11</sup> Nawa txãa cirkuncision yu' naasáa Dxusa's ũusuh jxuka yaakxpa'ga yuuxxáa yuwemeesak yuu jĩna kakwete snxal kí'pnisaçxá'. Txãa pa'gak Abrahana' tata na'wě kaseje', makwe cirkuncidãynimeesaçxawa Dxusa's ũusuh jxuka yaakxsawe'sx maawa jxukaysatz. Aça' maawa Abrahan na'wěy cirkuncidãynimeesaçxawa ũusuh jxuka yaakxsa yuutxi's Dxusa' txã'wěyçxáa yuwemeesa vxituna.

<sup>12</sup> Abrahana' cirkuncidãynisawe'sxtewa isa tata na'wěsa yuja', txãawe'sx yuu Abrahan na'wěy Dxusa's ũusuh jxuka yaakxwa'ja's ji'phute yu'.

*Ūsuhçxáa Dxusa's yaakxpa'ga Dxus puutx we'weni' kxtey yuuni*

<sup>13</sup> Aytewa Abrahamana' na'wēçxáak yuu txā'sna miiyajxwe: Abraham vxite' txajx jì'jwe'sx jīi Dxusa' puutx we'wek naa kiwe's jxuka txāawe'sxçxaçxáa yamuwa'ja's. Nawa Abrahamana' leya's yaakxpa'gaçxáa txā'wē Dxusa' yamuwa'ja's puutx we'weme', naasáa Abrahamana' ūsuh yuuçxáak Dxusa's jxuka yajkx, txāa pa'ga yuuçxáak ewgu yuu jīçxa naa kiwete yamuwa'ja's vxit.

<sup>14</sup> Txā'wē leya's nwēese'jsaçxáa naa kiwe's yamuwa'jsawaça', ūsuhçxáa Dxusa's yaakxsa' yamuwa'jsamée ne'ta yu', aça' kiwe ūsu'nja jīna Dxus puutx we'wenisa' kxulne' yuuwa'j yu'.

<sup>15</sup> Ley ūste', txā'sna kxtey yuumeexça', yuwesak ya'yu'. Nawa ley meete', ¿ma'wē leya's kxtey yuuya' ya'ājakx?

<sup>16</sup> Txā'wē leymée pa'gaíçxáak Abrahamana' ūsuh yuuçxáa Dxusa's jxuka yajkx, aça' txā'wē yaakxpa'gak Dxusa' naa kiwete jxuka yamuwa'ja's puutx we'we Abraham jì'jwe'sxtxi. Txāa puutx we'wenisa' leya's jì'phsawe'sx jīiçxáa meea', Abrahamwa ma'wēga Dxusa's ūsuh yuuçxáa jxuka yajkx txā'wēy yūusawe'sx jīi yā'jçxa. Txāa pa'ga Abrahamana' kwe'sx jxukaysate tata'.

<sup>17</sup> Txajíik Dxus librutewa na'jī': Nasa maazkuēesatewa jxukaysate tata yuuwa'jsa idxa's nvxiituçthu jīk Dxusa'. Dxus yakha' kīh yuhwa thēyme'. Txā' uusaatxwa ki' itxi vxitu'k, sa' kīh yuhwa vxyaawa'jmeetewa, kaavxya'ja'ja'k.

18 Dxus Abraham yakh puutx we'wenisa' weh yuhwa kxtey yuuwa'jsamée na'wěçxáak yu'. Nawa Abrahamana' txāa sūhmée Dxus we'weni' kxtey yuuna sūhnaçxáak ũuste yu'akh. Aça' Dxus we'weçxa': Iidx ji'ja' iiméh seena' kuh yuutxna jīna we'weni' kxtey yuuyujk. Txāa pa'gak nasa maazkuēesatewa jxukaysate tata yuu.

19 Abrahamana' uuwa'ja'sçxáa yā'kh ũythasna ũsu', cien anxu ji'phuçyā'kh yu' naa pa'ga. Aça' Sara' bagaçxte yuhwa luuçx ji'phuwa'jsameek yu', txā'wěçxámée thē'khweyā'kh yu'. Makwe txā'wētewa, Dxusa' pu'çxhina sūhwa'j yuuçxá'sku ji'phu' Abrahamana'.

20 Txāasak Dxus we'weni's jxpubana kuh jwed yajxnmée Dxusa' kxtey yuuna sūhna yuuçxáa yajxna Dxusa's weçxa.

21 Txāa pa'gatey Dxusa' txajx we'weni yu'sa' jxuka kxtey yuuwa'jsa' sūhna yuuçxáak fxi'ze.

22 Txā'wě Dxus we'weni's ma'wěçxáa yuhwa jxpubamée kxtey yuuna sūhwa'j yuuçxá's ũuste yaakxpagaçxáak Dxusa' Abrahamana's yuuwemeesa vxit.

23 Nawa Abrahamçxáak yuuwemée ewsa yuu jīna fxi'jni yuume'.

24 Kwe'sxtxiwa ja'da we'weçxak txā'jī', txāa pa'gatey kwe'sxwa Jesusa's ĩtxi vxit-sa Dxusa's ũusuh jxuka yaakxpagaçxáa yuuwemeesatha'w.

25 Kwe'sxtxi yuuwemeesa vxit-ya'íçxáak Dxusa' Jesukristo's pkalsawe'sx pa'gate uuwa'j vxitçxa ki' ĩtxi vxit.



## 5

*Yuuwemeesa yuupa'ga Dxus yakh fxi'zewa'ja's uyni*

<sup>1</sup> Txã'wě Dxusa's ũusuh yuuçxáa jxuka yaakxpa'gaçxáa Dxusa' kwe'sxtxi's yuuwemeesak vxit açá' ãçha' Dxus yakh wět fxi'zewa'ja's ji'ptha'w, kwe'sxtxi jxpe'jsa Jesukristo nwe'wepa'ga.

<sup>2</sup> Txã'wě Kristo kwe'sxtxi nwe'wepa'ga yuuçxáatha'w Dxus yakh wět fxi'zewa'the pa'j, Jesukristo's ũusuh jxuka yaakxpa'ga. Txãasa ãçha' Dxus tasxte pa'jwa'ja's ji'ptha'w, txãasatha'w wala weçxá'.

<sup>3</sup> Sa' Dxus tasxte pa'jwa'ja'sçxáa yajkçxa weçxamée, naa kiwete nxuswa'ja'swa weçxa'tha'w, txãa pa'gatey nxuswa'j en pa'the', jweeíçxáak Dxusa's çxhãçxha yaakxwa'j kaseje'.

<sup>4</sup> Açá' Dxusa's çxhãçxha yaakxwa'j kasehte, Dxus yakh txuteméek ya'fxi'ze'. Açá' Dxus yakh txutemée fxi'zeçxa', Dxus luuçxtha'w sũhwa'ja's ya'ji'phu'k.

<sup>5</sup> Açá' Dxus luuçxyã'ja', weh yuhwa ya'thameçme', txãa pa'gatey kwe'sx ũuste Dxus Espirituçxáa jxuka khêeçxa ũsna Dxus peeygãaniçxá's kaajiyu'jna.

<sup>6</sup> Kwe'sxçxáa yu' ya'nwe'wewa'ja's ãjameeyã'the', Kristo naa kiwete kiiwa'j en ãhte' pa'jçxa kwe'sx ewmeesa pa'gate uuk nwe'weya'.

<sup>7</sup> Kim yuhwa nasa ewmeesatx peeygãhçxa nwe'weya' uumeena. Meeçxa' maaíi yu' txã'wě

yuuwáatxna, nawa nasa ewsatexáa txã'wẽ yu-utxna.

<sup>8</sup> Kwe'sx yakh yu' txã'wẽ ewmeesa pa'gate uuwa'ja' wala thēya', nawa Dxusa' kwe'sx ewmeesatewa peeygãhçxa txajx Nçxi'ka's naa kiwete kaakh, ewmeesa kwe'sx pa'gate uukahh.

<sup>9</sup> Txã'wẽ Kristo kwe'sx pa'gate uupa'ga nwe'wenisatha'w yuu, sa' nmeh ente kastigo iiméh seena'sate yu' wejx nwe'wenisa yu'nja'w.

<sup>10</sup> Txãa pa'gatey kwe'sxa' Dxusa's açesateyuhwa, txãa yakh fxi'zewa'ja's vxitku Kristo's uuwa'j vxitçxa, na' açxh yu' Kristo uupa'ga yuuwemeesatha'w na' wejx nwe'wenisa yu'nja'w.

<sup>11</sup> Txã'wẽ yũupa'gatha'w Dxusa's wala weçxá', kwe'sxtxi nwe'wesa Jesukristo' Dxus yakh fxi'zewa'ja's vxitku naa pa'ga.

### *Adan yakh Kristo yakha' ja'dameeta'*

<sup>12</sup> Pkala' naa kiwete teeçx nasate yuuçxáa u'kaçxak uuwa'ja's vxit, txãa pa'gatx jxukaysa naa kakwe uuwa'ja's ji'phu, pkalte wetepa'ga.

<sup>13</sup> Ley kasehmey, pkala' naa kiwete ũsyã'kh yu'. Nawa ley pta'sxçxa: Naa ewmeesa' jĩna pta'sx ja'damée yu', ewmeesana sũhwa'ja's ya'ji'phu'çmeene'.

<sup>14</sup> Ley yu' meetewa, pkal ũsyã'the íitx Moises meetey Adanwe'sx jxukaysa peekx kakwe uuwa'j ena's ji'phu, Adan na'wēy yu' mée yũuçxa pkalte wetetewa, uu ena' ja'daçxaçxáak pa'j. Ew yajkxte yu', Adana' naa kiwete kīiwa'jsa ũsu'k txãa na'wēsak yu'.

15 Nawa Adan pkal yakh vxite' kwe'sx ewte neeyũunisa yakha' weh yuhwa ja'dameeta'. Teeçx piçthê'j pkalte wetepa'ga yuuçxáa jxukaysatx uuwa'ja's ji'phu, naapkaçxha' teeçx piçthê'j Jesukristo pa'ga yuuçxáa jxukaysatx txãa pkaluh ewte neeyũuwa'ja's ji'phu. Txã' jxukaysatxku nwe'we naa pa'ga jxthaakwe wala ewsak yu'.

16 Teeçx piçthê'jsa pkal yuuk txãa pkal yakh Dxus ũsku ewte neeyũuwa'ja's txãa yakha' weh yuhwa ja'dameeta'. Txãa pa'gatey teeçxsa teedxi'j pkal yũunisaçxáa maazkuêe us pkalsatewa ähsak yu', naapkaçxha' Dxus ũsku ewte neeyũuwa'ja's txã' maazkuêe pkal ji'phsatewa txãaju yuuwemeesak vxitna pa'j.

17 Teeçxsa yuuwe yuupa'gaçxáa, uuwa'ja' nesku yuuna pa'j. Aça' bagaçxte yuhwa pçumée ïtxi fxi'zewa'ja' wejx txã'wê bagaçxtewa nes yuuna Jesukristopa'ga.

18 Adan ewmée yũunisa' jxukaysatxku ewmeekhê vxitna pa'j, naapkaçxha' Jesukristo ew yũunisa' nasa jxukaysatxku yuuwemée ewsa vxit.

19 Txã'wê teeçx piçthê'j Dxusa's nwēese'pha'gameeçxáa jxukaysatx pkalsa yuu, naapkaçxha' teeçx piçthê'j Dxusa's nwēese'pha'gaçxáa jxukaysa yuuwemeesatx yuuna pa'j.

20 Kĩhçxah yũunisa txã'wê pkaltewa jxuka äate jiyukahn íçxáak leya' kaseh. Aça' pkala's txã'wê ew jiyuçpkaçxha', Dxus peeygãanisa yu' jwee íçxáak thaakwe wala vxyaa.

21 Pkala' uuwa'ja'sku vxit, naapkaçxha' Dxus peeygãani' pçumée ïtxi fxi'zewa'ja'sku vxit Jesukristo nwe'wepa'ga.

## 6

*Pkala's nwēese'jmée Kristo yakhçxáa ïtxi fxi'zewa'j*

1 Dxus peeygãhna peltunãyni' jweeíçxáa nes yuukahn, çpkalte fxi'zena nesmtha'w yuu? çMaa sũju'kwe'?

2 Kwe'sxa' peena yu' pkalte fxi'zewa'jsameetha'w, txãa pa'gatey pkaluh txuteeçxa peena yu' nwēese'jwa'jsa meeyã'tha'w, sa' çkĩjxa'çxáa jwee pkalte fxi'zena nes yuukxtha'w?

3 Meeçxa' jiyu'çmeewá'kwe, nawa maawa Kristo Jesus yakh fxi'zeya' yu'te ya'bautisãynijũ', Kristo yakh ja'da uusáa na'wētha'w yu'. Yu'te ya'bautisãyni txã'wē Kristo yakh ja'da uuçxa pedani na'wē yũunisa'.

4 Txãa pa'ga kwe'sxa' uuçxa pedani na'wēsatha'w yuu, aça' Kristowa ma'wēga Dxus pu'çxte uuniijũwa ki' ïtxi yuu aça' kwe'sxwa txã'wēy yuusaatha'w. Txãasa wala ew fxi'zewa'j jiptha'w.

5 Kwe'sxa' Kristo yakh ja'da uusáa na'wē yuuçxa, txãa yakh fxi'zena ũstha'w, txãa na'wēy ïtxi yuuçxa.

6 Txãasa jiitha'w Kristo' kwe'sx pkala's ivxi-ituya' kluuste uk, kwe'sxa' peena yu' pkalte fxi'zekahmen.

7 Aça' pkala' peena yu' jxkaajxa' ãjawa'jsame', txã'wẽ uusáa na'wẽ yuusa yã'txhi's.

8 Txãa pa'gatey kwe'sxa' Kristo yakh ja'da uusáa na'wẽ yuuçxa ãçxha' txãa yakh ãtxi fxi'zena ũstha'w naa pa'ga.

9 Kwe'sxa' jiitha'w Kristo' uuçxawa ki' ãtxi yu-unijũyã'ja', uu ena' peena yu' pa'jmeena txã'sa'.

10 Kristo' pkala's nmeh ivxiituya' teedxi'j yuuçxáak uu, txajũyã'ja' bagaçxte yuhwa peena yu' uuya'mée. Sa' ãçxha' Dxus yakh ãtxi nes yuuwa'jsa' bagaçx entewa.

11 I'kwe'sxwa txã'wẽy uusáa na'wẽçxáa mfxi'zewe, pkala's peena yu' nwẽese'jmée naasáa Dxus yakh yuuçxáa mfxi'zewe, Jesukristo's pi'kxçxa.

12 Pkala' peena yu' jxkaahwa'j ji'phme' i'kwe'sx kakwete, nawa nwẽese'jewá'kwe aça' txãái ki' jxkaajana.

13 I'kwe'sx kakwe's pkalte kselpi'jnuwe, we-jxwa Dxus kusete mekselpi'jwe, txãa pa'gatey Dxusa'sçxáa selpiia' sũhçxa ki' ãtxi yuusáa na'wẽsa i'kwe naa pa'ga. Aça' i'kwe'sx kakwe' Dxus kusete ewsa yuuçxáana selpiina.

14 I'kwe'sxa' jii i'kwe, leya' nwe'wewa'jsame', naa pa'ga ãçxha' Dxus nwe'wenite ũsi'kwe aça' pkala' peena yu' i'kwe'sx kakwete jxkaahwa'j ji'phme'.

### *Dxusa's yuuçxáa selpiia' utxani*

15 Txã'wẽ leya' nwe'weya' ãjãmeeyã'the', ¿ki' pkalteyçxáa fxi'zemtha'w, Dxus nwe'wenite ũsçxawa? Weh yuhwa pkalte fxi'zewa'jme'.

16 I'kwe'sxa' ew jii i'kwe, selpiina nwēese'jya' sūhçxa maawa patron tasxte pa'jçxa', txāa yuuçxá's i'kwe nwēese'jna selpi'. Txā'wēyíçxá' pkala'sçxáa nwēese'the', ewmeete vxituwa'jçxáak kaseje', naapkaçxha' Dxusa'sçxáa nwēese'the', Dxus yakh ew fxi'zewa'jçxáak kaseje'.

17 I'kwe'sxa' nyafxii' pkala'sçxáa i'kwe selpisáa yu'. Nawa açxha' Dxus pu'çxte', ūusuh jxuka weçxana i'kwe kaapiya'jni ewsa's jxp'a'ga txā's yuuçxáana nwēese'jna.

18 Txāasa i'kwe pkaluh txuteyã'jçxa', ew yūuna Dxusna selpiina fxi'zewa'the pa'j.

19 (I'kwe'sx ew jiyukahnthu naa kiwega selpinisa yakh kaaja'da'jçxa pta'sx.) Nyafxíiwa ma'wēkwe i'kwe'sx kakwe's ewmeeteçxáa kselpi'jna ūsu', txā'wēy açxha' Dxus kusete yuuçxáa ya'mdukhwe i'kwe'sx kakwe's txāa yuuçxá's selpiiya'.

20 I'kwe'sxa' nyafxii' ew yūuna fxi'zewa'ja's nwēese'jmée pkalte yuuçxáa fxi'zena ūsçxa',

21 kxte' çkijkwe ewsa uy, txā'wē thaampa'teçxáa fxi'zena ūsçxa'? Txā'wē fxi'zete', naasáa uuwa'j yuuçxáak vxya'.

22 Nawa pkaluh txuteyã'jçxa', Dxusna selpiwa'the i'kwe pa'j, aç'a' kxte yuuçxa' ewsa vxyaayuju'ík. Txā'wē yūuçxa', kíh pkal yuhwa ji'phmée fxi'zewa'ja's ya'jypa'ga'k, sa' nmeh ente' bagaçxte yuhwa pçuwa'jmée itxi fxi'zewa'ja'swa ya'ji'phuna.

23 Txā'wēme', pkala' naasáa uuwa'ja's yuuçxáak ūsu'. Nawa Dxusa' bagaçxte yuhwa

pçumée ïtxi fxi'zewa'ja'sku peesu', Kristo Jesus nwe'wepa'ga.

## 7

### *Ptamuní ley yakh kaaja'da'jni*

<sup>1</sup> Yakhthě'jwe'sx maawa leya's jiisa' peekx jii i'kwe leya' naa kiwete nasa nee ïtxiyteçxáa jxkaajxa' ájawa'jsa'.

<sup>2</sup> Ptamuuçxa fxi'zeni leya's miijajkxwe wakx: U'y iimi'sa' txajx nmi' uu ja'damée yu' vxite yakh iimi'ya' ájawa'jsame'. Txã'wě txajx nmi' uumey vxite piçthě'j yakh utxaaçxa fxi'zeçxa', pkal yuusak yu' jĩ'k.

<sup>3</sup> Nawa nmi' uuniijũyã'ja', peena yu' txã'wě jxkaahna nes yuuya' ája'çme', aça' txajx nmi' uuniijũ' vxite piçthě'j yakh iimi'ya' ájawa'ja'sku jxkaaja'.

<sup>4</sup> I'kwe'sxwa txã'wěy Kristo tasxte utxaasá' uusáa na'wěsai'kwe, aça' leya' uusa's jxkaajxa' ájawa'jsame'. Aça' áçxha' i'kwe'sxa' Kristo uuçxa ki' ïtxi yuuk txajx nasai'kwe, Dxus yuuçxáana selpiina fxi'zewa'jsa.

<sup>5</sup> Txã'wě Kristo tasxte utxamey, kwe'sx ewmée yũuya' yaakxnitx ley pta'sxçxa': Ewme' jĩ'k txáatxiçxáak wejx thaakwe yaakx wěe yuu. Aça' txã'wě yaakxpa'ga Dxus kastigote uuwa'jçxáak yuu.

<sup>6</sup> Nawa áçxha' leya' kwe'sxtxi thegwa'j ji'phme'. Txãa pa'ga áçxha' Dxus Espiritu jxkaahniçxá's nwěese'jwa'j ji'ptha'w, leya's yajxmée.

*Adx ũuste pkal ũssa*

7 Txã'wête', leya' ewmeesana ¿sũju'kwe'? Weh yuhwa txã'wême'. Txãa leya' naasaa kĩh txã'wê pkaltewa pta'sxsaxá'. Ley pa'gameewaça', adxa' jiyuwa'jmée ne'tka yu' kĩh txã'wê pkaltewa. Ley pta'sxçxa': Vxite jĩitx kusa'j wêena ewmée yũuwa'ja's yajkxna fxi'zewa'jme' jĩmeewaça', adxa' jiyuwa'jmée ne'tka yu' txã'wê yaakxnisa' pkaltewa.

8 Ley pta'sxçxa': Txã'wê yaakxni' ewme' jĩnijũk adx ũuste jweeíçxáa ewmée yũu wêenisaxáa ũusuthe. Ley txã'jĩmeewaça', pkalna sũhwa'j kasehwa'jmeene' yu'.

9 Adxa' nyafxiaa' ley pta'sxni's jiyumey yu', yuuwemeesath sũju'çxáath. Nawa ley pta'sxni's jiyunijũk jweeíçxáa ewmée yũu wêe yuu. Txãa pa'gath isa yuuwesa ne'tka sũhwa'ja's ji'phu.

10 Txajuth isa ew jiyu, leya' nwe'wepkaçxte, ewmée yũuwa'ja's kçxhãaçxha'jsaçxáak yuu adx yakha'.

11 Txãa pa'gatey pkala' leypa'gaíçxáak jweeíçxáa çxhãçxhaçxa adxa's Dxus kastigote uuwa'j vxit.

12 Txã'wêçxawa, leya' ewmeesame', txãa pa'gatey leya' kĩhtewa jxuka ew yũuna fxi'zewa'ja'sçxáak jxkaaja'.

13 Txã'wê leya' ewsaçxa', ¿ma'wêki'k adxa's Dxus kastigote uuwa'j vxit? sũju'th. Nawa ley txã'wê uuwa'j vxitme'. Ewmée yũu wêenisak Dxus kastigote uuwa'j vxit. Isa ew jiyute yu', ley jxkaahni ewsa's nwêese'jmée ewmée yũu wêenisaxá's nwêese'pha'gak txã'wê pkal yu'. Aça' txãa pa'gak nwêese'jnimeesa' pkalna



sũhna jiyunijũ' yuuwesa uuwa'j ya'yu'.

<sup>14</sup> Jiitha'w leya' Dxus yakh fxi'zewa'ja's yuh pta'sxi'k. Nawa Dxus yakh fxi'zemée ewmée yũuwa'ja'sçxáath yajkxna fxi'ze', naa pa'ga yu-uwesa' adxthu.

<sup>15</sup> Adxa' jiyu'çmeeth ma'wẽçxa ne'tka adxna selpiwa'jsa yu'sa' kxtey yuumeeçxa', adxna ewmée vxitwa'jsa yu'sa' kxtey yu'.

<sup>16</sup> Ley pta'sxçxa' ewme' jĩ'k aça' ewmeesatewa jiiçxath txãa ewmeesa's íiçxáa kxtey yu', txãa pa'gath leya' yuuwemeesana sũju'.

<sup>17</sup> Peekxçxáa txã'wẽ ya'yu'çmeene'. Adx ũuste ewmeesa ũsna txãane' txã'wẽ ewmée yũuwa'ja'sçxáa kaaũusuthe'je'.

<sup>18</sup> Txãa pa'gath adx ũuste' kíh yuhwa ewsa yu' meena sũju'. Txajiiçxáa ne'tka ewsa's nwēese'j wēeçxawa, kxtey yuuya' aja'çmée.

<sup>19</sup> Naasáa selpiwa'jmeesaçxá's kxtey yuuçxa', selpiwa'jsa yu'sa' kxtey yu'çmeeth.

<sup>20</sup> Na'jĩ'th na': Adxna ewmée vxitwa'jsa yu'sa' kxtey yuuçxa', peekxçxáa txã'wẽ ya'yu'çmeene', adx ũuste ewmée kaaũusuthe'jsa ũsna txãane' ewmeesaçxá's kxtey yuuwa'ja's kaaũusuthe'je' açne' txã'wẽ ya'yu'.

<sup>21</sup> Txajiiçxáak ewsaçxá's kxtey yu'nja sũhtewa, ewmée yũuwa'jçxáa kaseje'.

<sup>22</sup> Adx yu', Dxus leya's kxtey yu'nja sũhtewa,

<sup>23</sup> adx ũuste ewmeesa ũsna txãak ew yũuwa'ja's kaaũusuthe'je'çmée. Txãasak adxa's ewmeete yuuçxáa jxpe'je'.

<sup>24</sup> Adxa' seena' yuh ãhmeesath. Açá' adxa's ¿kim nwe'wekx naa kakwe na'wẽ uuwa'the yuuçxáa pe'jna u'jweça' txãajũ?

25 Txã'wētewa Jesukristo' pejka nwe'wek txãajũ, txãa pa'gath Dxusa's wala weçxá'. Txã'wēme', nyafxíi yu' Dxusa's selpi'nja sũhçxawa, adx ũuste ewmée yũuya' yaakxnixá'sthu selpi'.

## 8

*Dxus Espiritu's nwēese'pha'ga Dxus yakh fxi'zewa'kh kaseje'*

1 Txã'wē Kristo Jesus nwe'wepa'ga, kwe'sx kakwe ewmée yũuya' yaakxni's nwēese'jmée naasáa Dxus Espirituçxá's nwēese'jna fxi'zesawe'sx yakha' açxha' kīh kastigo yuhwa meea'.

2 Txãa pa'gatey Dxus Espiritu itxi kaafxi'ze'jwa'jsa' nwe'wek txã'wē pkalteçxáa fxi'zenijũ, sa' uuwa'theçxáa yã'j ũstewa txãajũwa nwe'wek, Kristo Jesus yakh fxi'zepa'ga.

3 Moises leya' kwe'sx kakwe ewmée yũunijũ txuhdeya' ajameeyã'the', Dxusa' txajx Nçxi'ka's kaakh nasaa kakwe's ũsçxa. Aça' txãa kakwe yakh kluuste uuçxak pejka nwe'we, pkala' peena yu' ewmée yũuna kaafxi'ze'khamen.

4 Txã'wē kluuste uuçxak kwe'sxtxi nwe'we, kwe'sx kakwe ewmée yũuya' yaakxni's weh yuhwa nwēese'jmée Dxus Espirituçxá's nwēese'the', Dxus leya' kīhtewa jxuka ew yũuna fxi'zewa'ja'sçxáak jxkaaja' txã'sna pejka kxtey yuuya' ajakahn.

5 Txãa pa'gatx ewmée yũuna fxi'zenijũ nwe'wenisa' Dxus yakh fxi'zewa'jçxá's yajkxna fxi'ze', naapkaçxha' ewmée ũus yaakxni's

yu'pthehnimeesa' ewmée yūuwa'ja'sçxáatx  
pa'pçxuna fxi'ze'.

<sup>6</sup> Aça' ewmée yūuwa'ja'sçxáa pa'pçxute', Dxus  
kastigote uuwa'jçxáak kaseje'. Nawa Dxus Espir-  
itu's nwēese'the', ũuste wēt fxi'zewa'kh kaseje'.

<sup>7</sup> Txã'wē ewmée yūuwa'ja'sçxáa pa'pçxusa',  
Dxusa's açesata'. Txã'wēçxaítx Dxusa's  
nwēese'je'çmée, sa' leya'swa kxtey yuuya'  
ãja'çmeeta'.

<sup>8</sup> Txã'wē ewmée yūuya' yaakxni's  
yu'pthehnimeesa' Dxus yakh iiwehdxí  
fxi'ze'çmeeta'.

<sup>9</sup> Nawa i'kwe'sxa' Dxus Espiritu's  
ũuste ji'phçxa', ewmée yūuya' yaakxni's  
nwēese'je'çmeei'kwe, naasáa Dxus  
Espirituçxá's i'kwe nwēese'je'. Aça' Dxus  
Espiritu's ũuste ji'phmeesa' Kristo jīimeeta'.

<sup>10</sup> Nawa Kristo' i'kwe'sx ũuste fxi'zena ũste',  
makwe kakwe yu' pkalpa'ga uuwa'jsatewa Dxusa'  
i'kwe'sxtxi' ki' ítxi vxituna, txãa pa'gatey Dxusa'  
i'kwe'sxtxi yuuwemeesak vxit naa pa'ga.

<sup>11</sup> Txã'wē Kristo Jesus uuniijūwa ki' ítxi vxit-  
sa Dxus Espiritu' i'kwe'sx ũuste fxi'zena ũççxa',  
i'kwe'sx uutewa ki' ítxi vxituna petx kakwe  
yã'jçxa.

<sup>12</sup> Txãa pa'ga Dxus Espirituçxá's nwēese'jna  
fxi'zewa'jsatha'w, ewmée yūu wēenisa's  
nwēese'jwa'j ji'phmeetha'w.

<sup>13</sup> Txã'wē ewmée yūu wēenisa's nwēese'jna  
fxi'zeçça', bagaçxte yuhwa Dxus yakh  
fxi'zewa'jmeete u'jwene'kwe. Nawa Dxus  
Espiritu pu'çxte ewmée yūu wēenisa's

nwēese'jmée jxukate nvxihtçxa', багаçxte yuhwa pçumée ĩtxi fxi'zewa'the u'jwene'kwe.

<sup>14</sup> Aça' maawa jxukaysa Dxus Espiritu jxpe'jnisa' Dxus luuçxta'.

<sup>15</sup> Ew mjiyuwe: I'kwe'stxi jxpe'jsa Dxus Espiritu' nyafxíi ley ma'wēga seena' jxkaaja' txã'wē seena' juuna' jxkaahwa'jsame', wejxwa Dxus luuçx yuukahn pu'çxsaçxá' ũukhmée weçxana fxi'zekahn. Txãasaíik kwe'sx ũuste na'wēçxáa kaaũusuthe'je' Dxusa' kwe'sx Tatana sũhwa'ja's.

<sup>16</sup> Txãasak Dxus Espiritu' kwe'sx ũuste khēeçxa kwe'stxi kaaũusuthe'je' Dxus luuçxtha'w sũhwa'ja's.

<sup>17</sup> Txã'wē Dxus luuçx yã'ja', Dxus jĩ's jxuka jxpa'gawa'jsatha'w. Dxusa' txajx jĩ yu'sa' jxuka Kristo's ũsuna txã'sna kwe'sxwa jxpa'ga'nja'w Kristo yakh ja'daçxah. Nawa Kristo yakh pxthaa yuuwa'ja's ji'phuçxa yuuçxáa cielute txã'wē jxpa'ga'nja'w Kristo yakh ja'daçxah.

<sup>18</sup> Cielute txã'wē seena' wēt wēt-sa's jxpa'gawa'jsatha'w, txãasa naa kiwete pxthaa yuunisa's le'çxkuēçxáa yuhwa yaakxwa'j ji'phmeene'tka'w sũju'th.

<sup>19</sup> Txãa pa'gaíiçxáatx Dxus pheu'jçxa nvxiitnisa kĳkĳhwa jxuka txakwe wala ũythasu', açxhíi yu' txakwe wala nxusna ũsçxawa, Dxus luuçx jxukaysatx jxukate nwe'wewa'j en seena' zhiçxkwe yũuwa'ja's.

<sup>20</sup> Txã'wē Dxus pheu'jçxa nvxiitnisa kĳkĳhwa jxuka nxusna ũskahníi jxukatx ewmeeteçxaxáa nvxiitni neeyũu. Txãasatx Dxus nwe'wewa'jena's txakwe wala ũythasu', Dxus pheu'jçxa nvxiitnisa' peekçxáa txã'wē ewmeete

neeyũumeeta', Dxusa' ma'wẽ nwe'wewa'ja'swa jiiçxane' ewmeete weteyã'the', txagaçxhíi yu' nwe'wemée kxtee nvxiht. Txãa pa'gatx txakwe wala nxusu'.

<sup>21</sup> Aça' Dxus nwe'wewa'j en ähte', txajũ yuuçxá' kijkĩhwa jxuka äçxh na'wẽ ewmeete ũsta' txãajũ nwe'weni yuutxna Dxus luuçx yakh ja'daçxah.

<sup>22</sup> Jiitha'w äçxhíi yu' kĩhwa jxuka wala yuh seena' pxthaa yuuna u'y nasate yaakasá na'wẽ pebeena ũsta'.

<sup>23</sup> Nawa Dxus pheu'jçxa nvxiitnisaçxáamée txã'wẽ pxthaa yuuna ũsta'. Kwe'sxa' Dxus ũsni yu'sa' jxuka jxpa'gawa'jsaçxa nyafxte ũsni txajx Espiritu's jxpa'gayã'tha'w. Nawa kwe'sxwa ja'da pxthaa yuuna ũstha'w, kwe'sx kakwe ki' itxi yuuwa'j en ähte Dxus luuçx jxukaysatx jxukate nwe'wewa'j ena's ũythasna.

<sup>24</sup> Txã'wẽ kwe'sx kakwe ki' itxi yuuwa'jsate iïçxáak Dxusa' nwe'we, aça' itxi yuuwa'ja's jiiçxatha'w ũythasu', txã'wẽ yuuwa'j en pa'jyujuna sũhna.

<sup>25</sup> Txã'wẽ itxi yuuwa'ja's jiimeewaça', ¿kĩjxa'çxáa ũythasukxtha'w? Nawa txã'wẽ yuuwa'j en ähmeya', nawa e'suçxáawa äayujuna sũhnatha'w ũythasu'.

<sup>26</sup> Txãa pa'gaiçxáak Dxus Espiritu kwe'sx ũuste khêeçxa pu'çxna kçxhãaçxhá'ja'. Kwe'sxa' Dxus yakh ma'wẽ puutx we'wewa'ja'swa jiimeeçxa sxiiguçtewa, Dxus Espiritu' kwe'sx pa'gate Dxus dxí'pte wala pa'pçxu'k iiméh wala nxus yajkxna.

<sup>27</sup> Aça' Dxusa' ũus yaakxni's jiisa', txãasak

Dxusa' jiyu txajx Espiritu yaakxni's, Dxus Espiritu' naasaa Dxus kxtey yuuwa'ja'sçxáak jxthãasu' kwe'sx jxukaysa pa'gate.

*Kĩh yuhwa txuhdemeetxna Dxus yakh fxi'zesatx*

28 Kwe'sxa' nxuswa'j ena's yaakxwa'j ji'phmeetha'w, txãa pa'gatey en ma'wēsawa pa'jçxawa, txãa yu' jxuka selpiwa'jsaçxaçxáata' Dxusna yaakxsawe'sx yuutxi's txã'sa' ew jiitha'w. Sa' txãawe'sxtxi' kĩh yuuya' ne' Dxusa' txhitxh txãa yu'sa' kxtey yuuna.

29 Txãasaíik maaçxah ne'ta txajx tasxte pa'jwa'jsa yu' txãa yuutxi' jxuka jiyuçxa nyafxíi entey txhitxh txajx Nçxi'k na'wēy yuukahn, aça' txajx Nçxi'k yu'sa' nyakh nthē'jsa yuuwa'jsak vxitçxa nvxiht.

30 Sa' txajx txhitxhnisatxi's txajx tasxte nuypa'kh, sa' txajx tasxte pa'jsatxi's yuuwemeesak vxit, sa' yuuwemée vxitnisatxi's txajx Nçxi'k yakh ih ũswa'jsak vxit.

31 Dxusa' kwe'sxtxi's txã'wē seena' ew yūute', ¿kim kwe'sxtxi' ewmeete nvxiht-ya' ājakx?

32 Dxusa' txajx Nçxi'ka's yuhwa ũçxhi'dxmée kwe'sx jxukaysa pa'gate kluuste uuçxa nwe'wekahn ũsku. Txajx Nçxi'ka's yuh ũsuççxa', kwe'sx kījwe peejini yu'sa' wejx thaakwe thēymée ũsuna.

33 Dxus txhitxhçxa yuuwemée vxitnisatxi', ¿kim ewmeesata' jīya' ājakx?

34 Kristo' kwe'sxtxi' nwe'weya' uuçxa ki' ĩtxi yuuçxa āçxha' Dxus paçu ju'gte ũsa' kwe'sx ju'gu

we'we pu'çxna, aç'a' çkim kwe'sxtxi ewmeete nvxiht-ya' ãjakx?

<sup>35</sup> Na'wě' aç'a' Kristo peeygãanisatxi's çkĩhçxá' txajũ txuhdeya' ãjama'k? Meeçxa' nxuswa'j en, yaaçewa'j en, pkxuüwa'j en, wěje en, sũpxçxáa nvxiitwa'j en, ãukhũukhte yuuçxáa fxi'zewa'j en, ikhte uuwa'j en kĩhwa thěysa pa'jana.

<sup>36</sup> Txajũik Dxus librutewa txã'wě yũuwa'ja's we'weçxa' na'jĩ':

Dxus yakh fxi'zepa'ga ikhte uuwa'jsaçxáatha'w, Piisxakuě's ikhya' jxũna u'jnisa na'wě kĩh entewa jĩ'k.

<sup>37</sup> Makwe txã'wě seena' yuuwa'j en pa'thewa, txãatxi' jxuka knaywa'jsatha'w, kwe'sxtxi peeygãasa Kristo pu'çxpa'ga.

<sup>38</sup> Txãa pa'ga Dxus peeygãanijũ' kĩh yuhwa txuhdeya' ãjawa'jsame's ew jũith: uu en ma'k yuu, meeçxa' naa kiwega ĩtxi fxi'zewa'j ma'k yuu, Dxus angeleswe'sx ma'tx yuu, eçxthě'j angeleswe'sx ma'tx yuu, meeçxa' eçxthě'j yuu ma'k yuu, meeçxa' ãçxh naa ensu nakwe seena' yuuçta' txãa ma'tx yuu, meeçxa' vxite en seena'sa yuhna txãa ma'tx yuu,

<sup>39</sup> meeçxa' infxiernojuwe'sx seena'sa ma'tx yuu, nawa Dxus peeygãanijũ' kĩh yuhwa txuhdeya' ãjameena, txãa pa'gatey kwe'sxtxi jxpe'jsa Kristo Jesus nwe'wenisa yã'tha'w naa pa'ga.

## 9

### *Dxus Israelwe'sxtxi txhitxhni*

<sup>1</sup> Adx jĩ'j judiuwe'sxtxi iiméh wala peeygãhna bagaçxtewa adx ãuste nxusna yuuçxáath fxi'ze'.

2 I'kwe'sx pa'gate adxa' Kristo yakh ũswa'ja's ivxiitute', i'kwe'sx jxukaysa ewte neeyũune'jwaça', adxa' peeygãaweete kxtey yu'nja sũju'th.

3 Adxa' i'kwe'sxtxi txã'wëth wala peeygãja' jĩçxa' ĩsxiiçxa txã'jĩçmeeth, txãa pa'gatey Kristo yakh fxi'zesaçxa' Dxus Espiritu kaaũusuthe'jniçxá'sthu we'we'.

4 Adx ji'jwe'sxa' Dxus txhitxhnisata', naa pa'ga Dxus luuçxta'. Txãapa'gak Dxusa' txãawe'sx ksxavxyte pi'kxna ũsu' eena' kweethna. Sa' ma'wëçxah pu'çxwa'ja'swa puutx we'wek. Leynawa ũsku. Dxuus yatte ma'wë yũuwa'ja'swa pta'sxku. Sa' kiwe's jxuka yamuwa'ja'swa puutx we'wek.

5 Txãawe'sxa' nyafxte Dxus txhitxhnisa Abrahaman ji'tha', aça' txãawe'sx ji'thek Kristo upxhna ũsu' nasaa kakwe yakh. Txãa Kristo' Dxusiçxáak yu', bagaçxtewa tuuthe'jni yu-uwa'jsa.

6 Israelwe'sxtxi Dxusa' nwe'weya' puutx we'wek txã'sa' kxtey yuumée yu' yuume'. Israel ji'j judiuwe'sxa' maai' yu' Dxus luuçx yu'çmeeta', txãa pa'gaçxáak maai' yuutxi' kxtey yuumée.

7 Txã'wëy Abrahaman ji'jwa jxukay yu' Dxus txhitxhnisa yu'çmeeta', txajĩik Dxusiwa na'jĩna ãate pta'sx: Iidx nçxi'k Isaakte upxsaçxáa iidx ji'j adx txhitxhnisa yuutxna jĩ'k.

8 Aça' Abrahaman ji'tha'w naa pa'ga Dxus txhitxhnisatha'w sũhwa'ja's ji'phmeeta' jxukay yu', naasáa Dxus puutx we'wenite upxsaçxáa Abrahaman ji'tha'.

9 Txãa pa'gatey Dxusa' na'jĩnak Abrahaman yakh



puutx we'we: En âhte', sxawedu'nja, aça' Sara' teeçx nçxi'k ji'phuna jîk.

10 Txã'wě Isaak upxwa'ja'sçxáa we'wemée, Rebeka nçxi'k e'zsa upxwa'ja'swa we'wek. Txãawe'sx neya' Isaakku yu', kwe'sx yaçgawe'sx.

11 Sa' txãa e'z nçxi'ksa upxyuumeyna, Dxusa' txhitxhku txãawe'sx ma'wě yūuna fxi'zeni's uymeçxawa.

12 Txãasak Dxusa' na'wě we'we Rebeka's: Nyakh yaçtewe'sxa' e'stewe'sxa's selpisáa yu-una jînak we'we. Ew jiyute yu', Dxusa' ew yūusaçxáatx txhitxhwa'jsa yu'çme', maatxwa tx-ajx wedxni yuutxi' txhitxhwa'jsaçxáak yu' txã'wě yūuwa'ja's kaajiyu'jnak makwe judiu ji'thewa pxakh e'zîi yuutxi' txhitxhmée, teeçxsaçxáana txhitxh.

13 Aça' Dxus librutewa txã'wěyçxáa we'wena fxi'jni ūsa': Jakoba's peeygāhth, nawa Esaua's peeygāhmeeth jî'k.

14 Dxusa' ¿ewmeesaçxa ma'k txã'wě ma'wěsatxwa txhitxhi'? Ewmeesa yu'çme'.

15 Txã'wěmeeçxaiik Moisesa's na'jîna we'we: Adxa' ma'wěsanawa peeygājaçxá'nja, sa' txã'wěy ma'wěsanawa pu'çxhiçxá'nja jî'k.

16 Txã'wě kwe'sx kîhçxáawa pa'pçxuçxa Dxus peeygāani's ya'jypa'ga'çme'. Kwe'sx kakweju kîhwa pa'pçxumeetewa Dxusa' peeygājaçxáak maatxwa.

17 Dxusa' ma'wěsanawa peeygājaçxáana, sa' txã'wěy wal'wa'jsa yu'sa' ma'wěsanawa kxtee nvxiituçxáana.

18 Txãasaíi Egipto kiwete jxkaahsa's Dxus librute pta'sxi'k na'jîna: Idxa's jxkaahwa'jsath vxit, adx kîjxa'wa jxuka ãjani's iidxpaga nasa jiyukahna, sa' adxa's kimtewa naa kiwete jxuka jiyukahnthu idxa's txã'wê yûu jî'k.

19 Txã'jîte', na'wê yaakine'ga: Dxusíi ne' ma'wê yûuwa'ja'swa vxitu', açá' kwe'sxa' yuuwemée ne'tka'w sūjune'ga.

20 Nawa ūus miiyajkx: Kwe'sx ma'wê yu-uwa'jsatewa Dxusa' jiiçxane' txã'wê yû', açá' idxa' txã'wê yaakxwa'j ji'phmeeg. Kiwe mitxha' çKîjxa'ga adxa's txã'wê umu? jîsaate ji-imeetha'w.

21 Mitxh umsa' ma'wê mitxha's umweçxtewa txajx wedxni yu'sa' vxituçxáana, txãa kiwe's iîçxáa ewte selpiwa'jsa, vxite' ewmeete selpiwa'jsa.

22 Dxuswa nasatxi' txã'wêyku vxit. Sa' maaítxi's wa'lpa'ga kastigo seena'sate ūswa'jsa vxitçawa, peeygãhçxa makwe txaçxwa ūythasku dud yu' kastigaímée.

23 Sa' vxite wa'lsameetxi's êe walate seena' zhiçxkwesa's jxpa'gawa'jsak vxit, txã'sna jxpa'gawa'jsatxi' nyafxii enteyku txhitxh. Açá' kxteewe'sxa' kwe'sxtha'w txajx peeygãanisa.

24 Dxusa' maatxwa txhitxhwa'jsaçxá', txãasaíik maaítxi' judiu ji'jtxwa txhitxh, sa' judiu ji'jmée vxite nasatxwa txhitxhku.

25 Txã'wê maatxwa txhitxhwa'ja's Oseas librute na'jînak we'we':

Adx txhitxhnimeesatewa, adx nasa vxitu'nja.

Sa' adx peeygãanisameetewa, adx peeygãanisa vxitu'nja jî'k.

26 Sa' nyafxíi we'weçxa': Adx luuçxmée i'kwe jĩçxawa, txãa e'su': Dxus itxisa luuçx yuune'kwe jĩna we'wena jĩ'k.

27 Nawa Israelwe'stxi we'weçxa' na'jĩ'k Isaiasa': Israelwe'sx ji'ja' kwet muse na'wẽ seena' kuh-saçxawa, kuhméeçxáa ewte neeyũtxna.

28 Ewsa' kuhméeçxáa yuukahníi wa'lsatxi's dud ivxiituna Dxusa' jĩ'k.

29 Txã'wẽ yũuwa'ja's we'weçxak Isaiasa' na'jĩ': Dxus kĩhtewa jxuka ãjasa judiu ji'jtx mazkuẽ nvxihtmeewaça',

Sodoma vxite' Gomoçxa çxhab na'wẽ jxukate vxituwa'jsa ne'tka'w yu' jĩ'k.

*Yuuwemeesa yuuya' Kristoçxá's jxpa'gani*

30 Æçxha' na'wẽ yũuni's miiyajxwe: Judiu ji'jmée vxite nasa' yuuwemeesa yuua'ja's pakwesameeçxawa, Kristo's ũuste wa'lmée jxpa'gasa yuupa'gaçxáa yuuwemeesatx yuuna pa'j.

31 Naapkaçxha' Israelwe'sxa' yuuwemeesa yuuna pa'jya' sũhçxa leya'sçxáatx kxtey yuuya' yajkx. Nawa leya'sçxáa yajkxçxa', yuuwemeesa yuuya' ãjameeta'.

32 ¿Kĩh yuuçxata ãjamée? Yuuwemeesa yuuya' Kristo's ũusuh jxuka yajkxçxa jxpa'gameeta' naa pa'gatx ãjamée. Kristo's ũusuh jxuka yaakipkaçxte, leya'sçxáatx yajkxna ũsu', txãasatx wala jxpuba.

33 Txã'wẽ jxpubawa'ja's Dxus librute na'wẽ pta'sxna fxi'jni':

Adxa' Jerusalen çxhabte kwet ki'puçthu, maaitxi' kaypuba'jçxa pẽtxwa'jsa.

Nawa maawa txã'sa' jxpubasamée yu', nxuste neeyũumeetxna jĩ'k.

## 10

<sup>1</sup> Yakhthē'jwe'sxtxi isath we'we': Israelwe'sx ewte neeyũuwaça' sũhçxath ũusuh jxuka Dxus yakh puutx we'we'.

<sup>2</sup> Adxa' jiith Israelwe'sxa' wala yuh Dxusa's pakwena pa'pçxuna fxi'ze'tx, nawa ma'wē Dxusa's pakwewa'ja'swa ew yu' jiimeeta'.

<sup>3</sup> Txã'wē ew yu' jiimeeçxaítx yuuwemée ewsa yuuya' sũhçxa txãawe'sxtxi ma'wēne' ew thegu' txã'sçxáanatx kxtey yuu wēje', Dxusna ma'wē pakwewa'ja'swa Dxusíi pta'sxna nvxihtku txãa yu'sa' kxtey yuumée.

<sup>4</sup> Txã'wē Moises ley jxkaahwa'j en skhēwnijũ' Kristo jxkaahwa'jsa', yuuwemée ewsa vxit-ya' ājawa'jsa txã'sna jxpa'gasa yuutxi's. Nawa txã'sna pakwemée leya'sçxáa kxtey yuu wēete', yuuwemeesa ya'yu'çme'.

<sup>5</sup> Txajíik ley jxkaahni's nwēese'jçxa yu-uwemée ewsa yu'nja sũhna yaakxsatxi's Moisesa' na'jĩna fxi'j: Maawa ley jxkaahni's jxuka kxtey yuusa' een isa ew fxi'zewa'jçxá's ji'phutxna jĩ'k.

<sup>6</sup> Nawa yuuwemée ewsa yuuna pa'jya' yu', Kristo's ũusuh jxuka yaakxwa'ja's Dxus librute na'wēk pta'sxi': Kristo' kījxã'kh aça' cielun pe'jya' u'jwa'ja's yaakxwa'jme'.

<sup>7</sup> Sa' txã'wēy Kristo' itxi yuuyã'kh aça' pedani-ikhēwa pe'jya' u'jwa'ja's yaakxwa'jme'.

<sup>8</sup> Txã'wē thēysa's yaakxkahmeníi, Dxus yuwe ewsa' iidx yuwete ih ũsa', thēymée ũuste

khēeya' jī'k. Dxus yuwe iidx yuwete ih ūsa' jī'k txā'sna thēymée jxpa'gawa'ja'stha'w pta'sxi'.

<sup>9</sup> Aça' na'wēçxáa myūu: Dxus Nçxi'k Jesukristo uutewa Dxusí ki' itxi vxitku sūhwa'ja's ji'phuçxa Kristo yuuçxá's nwēese'jya' jxpa'gawa'ja'. Txā'wē yuuçxa' ewte neeyūune'ga.

<sup>10</sup> Txā'wē ewte neeyūuya', Jesukristo's ūsuh jxuka yajkxçxa jxpa'gawa'ja', sa' āatewa tuuthe'jwa'ja'.

<sup>11</sup> Kristo's ūuste jxpa'gasatxi's Dxus librute na'wēk we'we': Txā'sa' ūuste jxpa'gasa' maa yuhwa nxuste neeyūumeetxna jī'k.

<sup>12</sup> Sa' judiu jī'j vxite' judiu jī'jmeesawa txāa na'wēçxaçxáa yuuwemée ewte neeyūuwa'jsata', txāa pa'gatey Jesukristo' jxukaysatx nwe'wewa'jsa'. Aça' txā'sna neewe'wesa yuutxi'sa' maatxwa jxukaysatx pu'çxwa'jsa'.

<sup>13</sup> Txajíik Dxus librute na'wē we'we': Maawa jxukaysa ūusuh yuuçxáa jxuka yajkxna Dxusa's neewe'wesa', yuuwemée ewte neeyūutxna jī'k.

<sup>14</sup> Nawa ¿ma'wē neewe'weya' ājatxki, txā'sa' ūuste ji'phmeeçxa'? Sa' ¿ma'wē ūuste jxpa'gaya' ājatxki, txā' nwe'wesa' jīna pta'sxni's iiwēse'jmeeçxa'? Sa' ¿ma'wē wēse'jya' ājatxki, kimwa txāa yuwe's pta'sxmeete'?

<sup>15</sup> Sa' ¿ma'wē txāa yuwe's pta'sxya' ājatxki, kimwa kaahmeete'? Txāa yuwe's pta'sxsatx we'weçxa', Dxus librute na'jī'k: Yuwe ewsa's pta'sxna pa'jni' wala yuh ewsa', txāa pa'gatey weçxana fxi'zewa'ja'stxi pta'sxi' jī'k.

<sup>16</sup> Txā'wētewa, jxukay yu' jxpa'ga'çmeeta' ewte neeyūuwa'ja's pta'sxtewa. Txajíik Isaiaswa

na'wě we'we: Kwe'sx pta'sxni Dxus yuwe's  
¿kimçxá' nwěese'jçxa kxtey yuuta? jĩ'k.

17 Txã'wě Dxus yuwe pta'sxni's ew jiyu-  
nijūk ũusuh jxuka jxpa'gawa'j kaseje', aça' txãa  
pta'sxnisa yu' Kristo'sku we'we'.

18 Txã'wě pta'sxtewa meeçxa'  
¿wěse'jmeewá'ntakx? Pejka wěse'jyuh ne'ta,  
txajík Dxus librutewa na'jĩna we'we':

Txãawe'sx pta'sxni's jxuka ya'wěse'kh.

Naa kiwete mtee mteewa jxuka pa'kh jĩ'k.

19 Makwe txã'wě yuutewa, Israelwe'sx yu'  
¿jiyumeewá'ntakx? Txãawe'sxa' jiyuyuhne'ta,  
nawa jxpa'gameeta'. Txãawe'sxwa jiyumée  
yu' neeyũumeene'ta. Txajík Moisesa' Dxus  
we'weni's na'wě pta'sxi':

Adxa' vxite nasatx ew yũuçxa i'kwe'sxtxi kuh  
kaayaki'ji'nja,

Aça' ũusçxawa'ja's uyuune'kwe, nasa Dxusa's  
jiimeesa ũsta' txãawe'sxtxi adx luuçx vx-  
itpa'ga jĩ'k.

20 Isaiaswa Dxus we'weni's na'wěk ãate pta'sxi':

Adxa's pakwena pa'pçxumeeçxawa, uytxi.

Aça' adxa' ãate vxyaath paapějxna adxna pak-  
wemeetewa jĩ'k.

21 Nawa Israelwe'sxtxi we'weçxa' na'jĩ'k Dxus  
librute:

Adxa' pa'yana nesthu yu' nasa wa'lsatx jĩ'k.

## 11

### *Israelwe'sx jxukate yu' vxitunimée*

1 Txã'wě pa'yatewa pasmeeyã'the', Dxusa'  
txajx txhitxhnisa Israelwe'sxtxi' ¿ahçema'k?

sũju'th. Nawa weh yuhwa txã'wẽ yuume'. Txã'wẽ ahçemeeçxaíik adxa' Israel nasa, Abraham ji'j, Benjamin nçxi'ktewe'sxthu nawa nwe'we.

<sup>2</sup> Dxusa' Israelwe'sxtxi nyafxiitey txhitxhçxa, ãçxpkaçx ahçemée iipe'ja'. I'kwe'sxa' jiine'kwe Dxus yuwe pta'sxsa Elias Dxus yakh puutx we'weni's.

<sup>3</sup> Kxte' na'jĩ'k: Iidx yuwee pta'sxsatxi's ikhtxi sa' iidx altalnawa jxuka ivxiitutx, naasáa adx yuuçxáath neeyũ. Nawa adxnawa ikh wẽje'íçxáatx jĩte',

<sup>4</sup> Dxus pasçxa': Dxus ãtximeesa Baal tasxte peejxũkwesamée siete mil nasa txhitxhçxa ji'pthu adx jĩi, aça' adxçxáath neeyũ sũhwa'j ji'phmeeg jĩk.

<sup>5</sup> Naa ensuwa txã'wẽyçxáa Israelwe'sx maafi yu' Dxus txhitxhnisa ũsta' txajx peeygãanisa.

<sup>6</sup> Dxusa' peeygãhçxa txhitxhku. Nawa ew yũuna fxi'zepa'ga txã'wẽ txhitxhme', naasáa peeygãhçxa yuuçxáak ewmeesatewa txhitxh. Aça' ew yũuna fxi'zepa'gaçxáa Dxusa' txhitxhwaça', Dxusa' peeygãhçxak txhitxh jĩya' ãjame'nja'w.

<sup>7</sup> Israelwe'sxa' ewte neeyũuwa'ja's pakweçxawa txazíi yu' uymeeta', vxite yu' Dxus we'weni's nwẽese'jmeeta' naa pa'ga. Naasáa Dxus txhitxhnisa maaíçxáatx ewte neeyũuwa'ja's uy.

<sup>8</sup> Aça' txã'wẽ nwẽese'jwa'jmeea's we'weçxak Dxus librote na'jĩ':

Dxusa' txãawe'sxtxi' jiyuwa'jmeesak vxit.

Aça' yafx ji'phçxawa uysamée na'wěçxáata',  
sa' thũ'wě ji'phçxawa wěse'jsamée  
na'wěçxáatx neeyũu.

Ãçxpkaçx txã'wěçxaçxáata' jĩ'k.

<sup>9</sup> Txajíik jxkaahsa Davxidwa na'wě we'we:

Txãawe'sx weçxana fxi'zeni' ewméeçxáa kase-  
hwaça' ewna,  
kastigãyni yuukahn.

<sup>10</sup> Txãawe'sx yafxa' peekx suweetxna, uyya'  
ãjakahmén.

Txãawe'sxa' багаçxte yuhwa ew fxi'zeyá'  
ãjameewaça' ewna jĩk.

### *Judiu ji'jmeesawa Dexus peeygãanisa*

<sup>11</sup> Judiuwe'sxa' jxpubaça weteyã'jçxa',  
¿peena yu' Dexus tasxte sx-  
awedwa'jsameetxmanx? Weh yuhwa txã'wě  
yuuwa'jsameeta'. Txã'wě judiuwe'sx wa'lpa'ga,  
judiu ji'jmée vxite nasatxku ewte neeyũuwa'ja's  
pta'sxni yuu, aça' vxite nasa Dexus yakh fxi'zeçte  
uyçxa', judiuwe'sxwa ki' sxawedxa' yaakxkahn.

<sup>12</sup> Judiuwe'sxa' ewte neeyũuwa'ja's jxpa'gaya'  
wa'lpa'ga, naa kiwete judiu ji'jmée vxite nasa  
jxukaysatxku selpí, txãasa judiuwe'sx jxukaysa  
Dexus tasxte ki' sxawednijũ' wejx wala selpiina.

<sup>13</sup> Ãçxha' judiu ji'jmée vxite nasa jĩnisa  
i'kwe'sxtxi we'weya'wath, txãa pa'gatey adxa'  
judiu ji'jmée vxite nasatx Dexus yuwe's pta'sxya'  
kaahnisath, txãasa kxtey yuuya'wath.

<sup>14</sup> Txã'wě yũute', i'kwe'sx ewte fxi'zeni's adx  
ji'j maái yu' uyçxa', i'kwe'sx na'wěy ewte  
fxi'zewa'ja's pakweya' yaakiwáatxna sũju'th.



15 Judiuwe'sx e'skhē nvxiitni yuupa'ga judiu j'i'jmée vxite nasatx Dxus yakh weçxana fxi'zewa'ja's ji'phu. Txãasa judiuwe'sxa' Dxus tasxte ki' sxawedna pa'jçxa', uuniijũ ki' ïtxi yuusáa na'wēsa yuutxna.

16 Ũ'tasx kīhwa nyafxtewe'sxa's Dxus jīi peeste', neeyūsáawa jxukak Dxus bedekīyni yu'. Fxtūu tasxa' Dxus jīite', ku'tawa jxuka Dxus jīiçxaçxáata'.

17 Judiuwe'sx maafi yu' uuhnisa oliwo fxtūu ku'ta's spē'thni na'wētx yuu. Aça' txãa spē'thnite yu' uuhnimeesa oliwo ku'ta's pūpxçxa kayweçe'jnisa na'wē i'kwe yuu, i'kwe'sx judiu j'i'jmée vxite nasaçxawa. Txãasa i'kwe txãa fxtūu tasx na'wēy ewsa yuuna pa'j, oliwo fxtūu tasx ïtxisate kayweçe'jni yuupa'ga.

18 Nawa txãa ku'ta spē'thnisate jxthaakwe ewsath sūhna yu' yaakxnu. Mpa'yajkx, txã'wēme' ku'ta pūpxnisa txã'wē fxtūu tasx ïtxi yuuwa'ja's ũsu'çme'; fxtūu tasx kiwete iwehçesak ku'ta pūpxnisa's ïtxi yuuwa'ja's ũsu'.

19 Txã'wētewa, naa sūjuwá'ga: Txãa fxtūu ku'ta spē'thnite kayweçe'jya' adxa's peejxne'ta yu', txãasane'ta ku'ta dxih yu'sa' spē'th sūjune'ga.

20 Nawa idxa's kxtee kayweçe'jya' sūhçxa spē'thni yuumeeta'. Txãawe'sxa' Kristo's jxpa'gaya' wa'ltxi txãa pa'ga yuuçxáatx spē'thni yuu. Naapkaçxha' idxa' Kristo's wa'lmeeg jxpa'ga, txãa pa'ga yuuçxáag txãawe'sx ũsnite yu' idx pa'jya' aja. Txãa pa'ga iwejçx yajkxmée, wala jxpa'yakx mfxi'ze.

21 Txã'wẽme', Dxusa' judiu txajx txhitxhnisa yuhtxwa thẽyméek kutxi'j na' idxa's yu' wejx txã'wẽ thẽymée kutxi'jina jxpa'yakxmeete'.

22 Ūus miiyajkx: Dxusa' wala yuh peeygãasa'. Nawa juuna'ya'wa txã'wẽyçxá'. Nwẽese'jsamée yakh yu', wala yuh juuna'sa'. Nawa idx yakh yu' wala yuh peeygãasa'. Txã'wẽyã'the', txajx peeygãanijũ txutemée mfxi'ze. Txã'wẽ yu-umeeçxa', idxwa kutxi'jnisa yuune'ga.

23 Nawa judiuwe'sxa' Dxusa's ki' pakweçxa yu', Dxus tasxtey thẽymée ki' pa'jya' ãjatxna, txãa pa'gatey Dxusa' thẽymée jxpa'gawa'jsa'.

24 Txã'wẽ idxa' judiu ji'jmée vxite nasag yu' na's yuhwa thẽyméek ewsate yuutxa. Naap-kaçxha' judiuwe'sx yu' Dxus txhitxhnisatx yu', aç'a txãawe'sxtxi' wejx thẽymée ki' jxpa'gana.

### *Israelwe'sx Dxus tasxte jxuka sxawedni*

25 Yakhthẽ'jwe'sx, Dxus ma'wẽ yũuya'waçxawa txãa yuuçxáak jii yu' txã'sna mjiyuwe açxha' iiwejçx yajkxna fxi'zeya'mée: Judiuwe'sx maaí yu' txã'wẽ yuh Dxusa's nwẽese'jmeeçxa txuteetx. Nawa judiu ji'jmée vxite nasa maazkuëesa Dxus tasxte pa'jwa'jsa ũstxna txãa jxuka ãhpkaçxçxáatx judiuwe'sxa' Dxus tasxu txutee.

26 Sa' vxite nasa jxuka Dxus tasxte pa'jna jxã'jaçpkaçxha', judiuwe'sxa' ki' jxukay nwe'wenisa yuutxna. Txã'wẽ yũuwa'ja's Dxus librute na'wẽk pta'sxi':

Nwe'wesa' Jerusalen çxhabu pa'jçxa', Jakobwe'sx ewmée yũuni's txudena.

27 Txã'wě ewmée yũuni's txuhdeya'th puutx we'we txãawe'sx yakh jĩ'k.

28 Txã'wě i'kwe'sx ewte neeyũuwa'ja's ji'phukahñçáatx judiuwe'sxa' Dxusa's açesa yuu. Nawa Dxusa' txãawe'sx yuutxi' açe'çme', txãa pa'gatey judiuwe'sxa' nyafxiitey Dxus txhitxhnisatx yu' naa pa'ga.

29 Txãa pa'gatey Dxusa' ũsyã'jçxa', kusa'ja'çme', sa' pa'yayã'jçxa', wa'lu'çme'.

30 Nyafxiia' i'kwe'sxa' Dxusa's jiimeeçxa nwēese'jsamée i'kwe yu'. Nawa açxha' judiuwe'sx nwēese'jeçmeete yu', i'kwe'sxa' Dxus peeygãanisa i'kwe yuu.

31 Nyafxiia' i'kwe'sxwa ma'wěkwe nwēese'jsamée yu', txã'wěy judiuwe'sxwa açxha' nwēese'jmée ũsta'. Nawa i'kwe'sxwa ma'wěkwe Dxus peeygãani's jxpa'ga, txã'wěy jxpa'gaya' íçxáa txã'wě nwēese'jmée ũsta'.

32 Txã'wě teeçxsaçxáa thaakwe ewsath sa' thaakwe peeygãanisath sũjkahmenku e'zúitx ja'daçxah nwēese'jwa'jmeete vxit txãa na'wěçxaçxáa peeygãjxa'.

33 Dxusa' ma'wě yũuwa'ja'swa seena' yuh zhiçxkwe ew pheu'jçxa ji'phune' txã'sna ya-jkxte', le'çxkweçxáa yuhwa ya'jiyu'çme', sa' pta'sxya'wa ya'ãja'çme'.

34 Dxus ũus yaakxni's ¿kimçxá' jiyusa ũstxmanx? ¿Kimçxá' Dxusa's kaapiya'jsa ũstxmanx?

35 Kĩjkĩhwa jxuka Dxus jĩiçxaçxáata' txajx nvxiitnisa, açá' ¿kimçxá' adx jĩ'sthu Dxusa's pees jĩwa'jsa ũstxmanx?

36 Txãasa Dxusa' seena' yuh wala ewsa' bagaçxtewa nes yuuwa'jsa. Txã'sa' seena' yuh wala weçxawa'j ji'ptha'w.

## 12

### *Kwe'sx itxi fxi'zeni's Dxus kusete dukhni*

1 Adx yakthē'jwe'sxtxi neewe'we'th: Dxusa' txakwe wala peeygãapa'ga, ãçxha' i'kwe'sx itxi fxi'zeni petx kakweyã'jçxa jxuka kîh pkal yuhwa ji'phméé txajx kuseteçxaçxáa ya'mdukhwe, Dxusa's yuuçxáa selpiina fxi'zeyá'. Dxusa' txã'wē yūuni'sku jxthãasu' naa pa'ga kxtey yuuwa'j ji'ptha'w.

2 ãçxhüyã'ja' naa kiwetewe'sx na'wēy yu' fxi'zenuwe, wejxwa i'kwe'sx fxi'zeni i'kwe'sx ūus yaakxni txáatx jxuka myu'pthehwe, kîhtewa jxuka u'se yuuna pa'jya'. Txã'wē yūuçxa Dxus jxthãasni ewsa, txajx dxi'pte zhiçxkwe wēt fxi'zeniçxá's jiyune'kwe.

3 Dxusa' peeygãhçxa adxa's neewe'wek i'kwe'sxtxi yu'kxpejkahn, txãa pa'ga yu'kxpehwa'j ji'pthu: Adxçxáath thaakwe selpi' sūhna maa yuhwa iwejçx yaakxwa'j ji'phméé i'kwe, naasáa kîhte selpiwa'jsa ne' Dxusa' nvxiht txã's yuuçxáana kxtey myūuwe, wala jxpa'yakxna.

4 Nasaa kakwe's miiyajkxwe: Txã' teeçxçxáaçxawa wala kuh jwed ji'pha', sa' fxiyfxiyçxahtx selpi', teeçx kakwetewe'sxçxáa we'sxçxawa.

<sup>5</sup> Txã'wěy kwe'sxwa wala kuhçxawa, jxukaysa Kristo yuuçxá'stha'w selpi', jxukaysa kxteeçxah fxiyfxiyçxah selpiina.

<sup>6</sup> Kwe'sx selpiiya' ãjawa'ja's Dxusa' fxiyfxiyçxajk ũs, kîhteçxah selpiiya' ãjawa'jsa ne'tka'w yu' txãa yu'sa' jxukak ũs. Aça' txãatxi' wala jxpa'yakx iixũwa'j ji'ptha'w. Meeçxawa Dxusa' txajx yuwe's pta'sxya' ãjawa'ja's ũste', txajx kaajiyu'jniçxá's kxtey yuuwa'j ji'ptha'w.

<sup>7</sup> Vxitesatx selpiina fxi'zewa'ja's ũste', txã'snawa kxtey yuuwa'j ji'ptha'w. Sa' maawa kaapiya'jya' ãjasa' txã'sa' kxtey yuuwa'ja'.

<sup>8</sup> Nxuste fxi'zesatx puutx pu'çxya' ãjasa' txã'wě yũuwa'ja's nvxiitwa'jme'. Peesya' yaakiççxa', kaasxwedu'juna sũhmée txã'wě peeswa'ja'. Dxus luuçxtxi jxpe'jsa', wala jxpa'yakx jxpe'jwa'ja'. Peejiina fxi'zesatx pu'çxsa', weçxana pu'çxwa'ja'.

*Dxusa's jiisa' na'wě yũuwa'ja'*

<sup>9</sup> Teeçxsa na'wěçxah puutx ya'peeygãawa'ja's mji'phuwe, ãsxiimée ũusuh jxuka yajkxna. Ewmeesa's nwěese'jmée ewsaçxá's kxtey myu-uwe.

<sup>10</sup> Yakhthě'ja's juuna' yuumée wejxwa yakhthě'ja' thaakwe walasa' sũhna puutx ya'mpeeygãhwe.

<sup>11</sup> Dxusa's selpiwa'ja'sçxáa ũusuh jxuka weçxana mpa'pçxuwe, wa'l yajkxmée.

<sup>12</sup> Ewte pa'jwa'ja's jii i'kwe txãa pa'ga weçxana mfxi'zewe. Nxuswa'j en pa'thewa txã'sa' yajkxmée, bagaçxtewa Dxus yakh yuuçxáa puutx we'wena mfxi'zewe.

13 Yakhthē'jwe'sx peejiina fxi'zesawe'sxtxi' mpu'çxwe. I'kwe'sx yatte pa'jsatxwa wa'lmée mpa'gawe.

14 I'kwe'sxtxi ahçena pkxuusatx ka'tu yu' ewçxáa myũuwe, wejx yuuwa txãawe'sx pa'gate Dxusa's mneewe'wewe nwe'wekahn.

15 Weçxasáa yakh i'kwe'sxwa weçxaa mpu'çxwe, sa' nxussa yakh i'kwe'sxwa nxus mpu'çxwe.

16 Puutx ja'daçxah ewçxáa mfxi'zewe. Jxthaakwe jiith sũhçxa iiwejçx yajkxmée, ãhmeekwesa na'wēyçxáa mfxi'zewe.

17 Makwe ewmée yũusaatewa, ka'tu yu' ewmée yuuwa'jme'. Ew yuuwa'jçxá's pa'pçxuwa'ja' jxukaysatx.

18 Jxukaysa yakh ew fxi'zewa'jçxá's mpaak-wewe, i'kwe'sxtxi ma'wē wejx ew theguna txãa yu'sa' jxuka kxtey yuuna.

19 Yakhthē'jwe'sxtxi neewe'we'th i'kwe'sxtxi ewmée yũusaatx ka'tuwa ewmée yũuwa'ja's pakwena fxi'zekahmén. Txã'wē yũumée wejxwa idxna ewmée yũusa's kuçx yuunu, Dxus kastigãywa'jsa' naa pa'ga. Txajíik Dxus librutewa na'wē we'we': Ewmée yũusatx kastigãywa'jsa' adxthu. Adx jiine'tka jĩ'k.

20 Txã'wē ka'tu ewmée yũuwa'ja's yajkxmée na'wē myũu: Idxna açesa ũ'wa'j jiphmée wēena fxi'zeçte', ũ' mpuuç. Sa' yũ'wēena fxi'zeçte', tudxwa'jwa mes. Idxa' txã'wē yũuçxa', kaythame'jene'ga jĩ'k.

21 Idxna ewmée yũusa's kaaknayu'jnu, wejxwa idx khuē'y meknay, ka'tu' ew yũuçxa.

## 13

*Naa kiwete jxkaahsawe'sx ma'wēsatsxwa  
nwēese'jwa'ja'*

<sup>1</sup> Naa kiwete jxkaahsawe'sx ma'wēsatsxwa jxuka nwēese'jna mfxi'zewe. Txāawe'sxa' jxuka Dxus nvxiitnisaxçaxáata'. Maa yuhwa Dxus nvxiitnimeesa yu' meeta'.

<sup>2</sup> Aça' maawa jxkaahsawe'sxtxi açesa' Dxus nvxiitnisatx açesa yuuna. Txā'wē açesa' yu-uwesa kastigāywa'j yuuna.

<sup>3</sup> Jxkaahsa ũsta' txāawe'sxa' ew yūuna fxi'zesatxi' kastigāywa'jsameeta'. Txāawe'sxa' ewmée yūuna fxi'zesaçxáatx kastigāywa'jsata'. Aça' jxkaahsawe'sxtxi ũukhmée fxi'ze wēeçxa', txāawe'sx yu'kxpehnitx jxuka nwēese'jna mfxi'zewe. Txā'wē yūsaxti' nwe'wewa'jsata'.

<sup>4</sup> Txāa pa'gatey jxkaahsawe'sxa' Dxus nvxiitnisata', idxna pu'çxwa'jsa. Nawa idxa' ewmée yūuna fxi'zeçxa', ũukhwa'j ji'phune'ga, txāa pa'gatey jxkaahsawe'sxa' peekxçxáa ũsmeeta', txāawe'sxa' Dxus nvxiitnisata'. Txāa pa'ga ley ma'wē jxkaathe', kxtey yuutxna ewmée yūusa's kastigāyna.

<sup>5</sup> Txāa pa'ga jxkaahsawe'sxtxi nwēese'jwa'ja', nawa kastigo's ũukhçaxçxáa nwēese'jmée, we-jxwa Dxus jxkaahni's kxtey yuuçthu sūhna nwēese'jwa'ja'.

<sup>6</sup> Txāawe'sxa' Dxus nvxiitnisayā'jçxa', txāawe'sx thegwa'j yu'sa' kīhnawa jxukatx kxtey yuuna fxi'ze'. Txāa pa'ga txāawe'sxtxi dukhwa'j vxyu's ũswa'j ji'phi'kwe.

7 Kĩhçxah yuuwa'j ji'phçxawa, txã'sa' kxtey yuuwa'ja': vxyuu gobierno jĩ's yuulçxa', txã'snawa dukhwa'ja'. Sa' maaçxahtx nwēese'jwa'j ji'phçxawa, txāawe'sxtxi' nwēese'jwa'ja' wa'lmée.

8 Kĩh yūuwa'ja'swa jxuka kxtey yuuwa'ja', kĩh yuul yuhwa ji'phmée fxi'zeya', naasáa puutx ya'peeygāawa'ja's yuuçxáa bagaçxtewa ji'phuna nes yuuwa'ja'. Txã'wē puutx ya'peeygāasa' Dxus jxkaahni leya's kxtey yuusaaçxa txã'wē yuuna.

9 Dxus leya' na'wēk jxkaaja': Ptamsayã'ja' vxite yakh kazx pkal yuuwa'jme'. Nasa ikhwa'jme'. Pesweewa'jme'. Vxitetx ĩsxiina nuywe'wewa'jme'. Vxitee jĩitx kusa'j wēena fxi'zewa'jme' jĩ'k. Aça' txāa jxkaahnitxi' jxuka kxtey nwēese'jya' na'wē yūuwa'ja': Vxitetxwa mpeeygāh, idx ma'wēga ya'peeygāja' txã'wēy jĩ'k.

10 Txã'wē puutx ya'peeygāawa'ja's ji'phçxa', ewmée yūuwa'j yu'sa' ya'yajkxmeena. Na'jĩ'th na': Peeygāanisa's ji'phte yuuçxáak Dxus jxkaahni leya's kĩhte yuhwa peejxmée jxuka kxtey ya'yu'.

11 Txã'wē peeygāawa'ja's jxpa'yakxmeene'kwe aça' açha' jweeíçxáa utxaana u'jweça' kwe'sxtxi jxukate nwe'wewa'j ena', txāa pa'ga jxpa'yakx meswe.

12 Txã'wē yūuwa'j ena' pa'jya' jx-thēyuumeena, txāa pa'ga çxhi'dxte fxi'zeni's nvxihtçxa, eena'te fxi'zewa'ja's jxpa'yakxwa'j ji'ptha'w.

13 Na'wē yūumée: ewmée yūuwa'jçxá's ya-jkxna, kazx pkal yuuna, puutx yahçena puutx



puuina, beka yat-su tūuna susna txã'wẽ yūumée, ewçxáa yūuna zhiçxkwe fxi'zewa'j ji'ptha'w.

<sup>14</sup> Naasáa Jesukristo ma'wẽ jxkaathe', txã's yuuçxáa jxuka nwēese'jwa'j ji'ptha'w, peekx ūus yaakxni ewmeesa yu's nwēese'jmée.

## 14

### *Yakhthē'ja's açewe'wewa'jme'*

<sup>1</sup> Kristo kaapiya'jni's açxamée ew jiisa yakhthē'ja's wa'lmée mpa'gawe, txajx jxpubanisu açewe'wemée.

<sup>2</sup> Miiyajkxwe wakx vxiteya' naa sūju'tx: Ū'nisa yu'sa' kīhnawa jxuka ũ'wa'ja' sūju'tx. Naapkaçxha' Kristo kaapiya'jni's açxamée ew jiisa' ũ'wa'ja's txhitxhçxa ũ'wa'ja' sūju'tx.

<sup>3</sup> Aça' maa sūhmée kīhnawa jxuka ũ'sa' txhitxhçxaçxáa ũ'sa's açewe'wewa'jme'. Txã'wẽy txhitxhçxaçxáa ũ'sawa kuçx açewe'wewa'jme' kīhnawa jxuka ũ'sa's. Ma'wẽ ũ'saçxawa txãawe'sxa' Dxus luuçxta'.

<sup>4</sup> Idxa' ¿kimçxaga iidx jxpe'jnimeetx açewe'we'? Txã' ew ma'k yuu ewmée ma'k yuu nawa txã'sa' patron jxpe'jsa jiina, txãa pa'gatey jxpe'jsa' ma'wẽ ew fxi'zewa'ja'swa txãa pu'çxwa'jsa'.

<sup>5</sup> Vxiteya' naa sūju'tx: Fxiesta en yuutxi' jxuka ki'swa'ja' sūju'tx. Naapkaçxha' vxite' maa fxiesta yuutxi' ki'swa'jme' sūju'tx. Ma'wẽ yaakxsaçxawa teeçxsa na'wẽçxah i'kwe'sx ūuste ew ūusutheniçxá's nwēese'jna mfxi'zewe kuçx açewe'wemée.

<sup>6</sup> Txãa pa'gately fxiesta entxi jxuka ki'ssawa, Dxusa's weçxanak ki'su', aça' fxiesta entxi jxukamée ki'ssawa Dxusa's iïçxáak weçxana fxi'ze'. Txã'wēy kīhnawa jxuka ũ'sawa Dxusa's weçxanak ũ'we', aça' kīh iiyuutxi' ũ'sameewa Dxusa's iïçxáak weçxá'. Jxukay Dxusa'sçxaçxáatx weçxá'.

<sup>7</sup> Txãa pa'gately kwe'sx itxi fxi'zeni kwe'sx uuwa'j ma'k yuu nawa txã' kwe'sx jīi meeta', aça' peekx ma'wēwa yūuna fxi'ze'nja sūhwa'j ji'phmeetha'w.

<sup>8</sup> Na'wē itxi fxi'ze'tha'w txã' Kristo jī', sa' uumtha'w nawa Kristo jxthãasniçxá'stha'w kxtey yu', txãasa itxi fxi'zeni ma'k yuu uu en ma'k yuu nawa Kristo jīiçxaçxáata'.

<sup>9</sup> Txã'wē Kristo' itxisawe'sx ma'tx yuu uusaawe'sx ma'tx yuu nawa jxukaysate namu yuuya'iïçxáak uuniijūwa ki' itxi yuu.

<sup>10</sup> Namu' Kristo', aça' idxa' namumeeçxa' çkījxa'ga iidx yakthē'ja's ewmeesa' jīna açewe'we'? Dxus tasxte kuutxa'jni yuuwa'jsatha'w, aça' Dxus yuuçxáa ma'wē yuusaatewa we'wewa'j ji'pha'.

<sup>11</sup> Txajīi Dxus tasxte kuutxa'jni yuuwa'ja's Dxus librute na'wē fxi'jni':

Adxa' Dxus itxisa isath we'we',  
Majūwe'sxwa jxuka adx tasxteçxaçxáa pee-  
jxūkwena pa'jçxa,

Dxus yuh yu'ga jīna weçxaatxna.

<sup>12</sup> Txã'wē yūuçxa teeçxa na'wēçxah Dxus tasxte paswa'j ji'phu'nja'w ma'wē yūusaaçxawa.

*Yakthē'ja's kaypuba'jwa'jme'*

13 Txãa pa'ga âçxhũyã'ja' txã'wẽ ewmeeg yu' jĩna puutx açewe'wena fxi'zewa'j ji'phmeetha'w. Txã'wẽ yũumée wejxwa ewçxáa yũuna mpu'çx, yakthẽ'j jxpubakahmén.

14 Adxa' jiith Kristo Jesus yakh fxi'zesa yakha', kĩh ù'yuhwa ewmeesa yu' meea'. Nawa txã'wẽ ewmeena sũhna yaakxsa yakh yu' ewmée yuhna.

15 Nawa iidx yakthẽ'j dxi'pte jxpa'yakxmée kĩhnawa ù'pa'gaçxáa txãa yakthẽ'ja' jxpubawáana açá' idx yuuwesa yu-une'ga peeygãasamée. Kristo uuçxa nwe'wenisawe'sxtxi' idxa' kaypuba'jnu iidx ù'nisa yakh.

16 Idx yakh yu' ewsaçxawa, vxitesa yakh yu' ewmeesa wáa yuuna açá' txã'wẽ yũuweçxsa yuutxi' wala mpa'yajkx.

17 Txãa pa'gatey Dxus yakh fxi'zewa'ja' ù'nisatx jxpa'yakçxa txã'wẽ Dxus yakh ya'fxi'ze'çme', naasáa Dxus Espiritu pu'çxte yuuçxáak Dxus yakh wêt weçxana jxpubamée fxi'zewa'ja's ya'ji'phu'.

18 Txã'wẽ vxitetx kaypuba'jmée jxpa'yakx Kristo's selpiite' Dxusa' weçxa'k açá' nasawa weçxa'tx txã'wẽ yũute'.

19 Txã'wẽ puutx ew yũuna puiimée fxi'zewa'jçxá's pakwewa'j ji'ptha'w, Dxus yakh jweeíçxáa çxhãçxha fxi'zewa'ja's puutx ya'pu'çxna.

20 Ù'nisa' jxuka ewsata'. Nawa vxitesatx kaypuba'jwa'ja's ù'teçxáa ewme'. Txãa pa'ga Dxus yakh fxi'zesa yakthẽ'jwe'sxtxi' kaypuba'jnu

iidx ũ'ni yakh.

<sup>21</sup> Txã'wě peekx yakhthě'ja's kaypuba'jwa'j yu'sa' ũ'nimée wejx ewa', çxiçx, vxino, kîhwa kaypuba'jwa'j yu'sa' jxuka.

<sup>22</sup> Idx yakh yu' kîh ũ'wa jxuka ewsatewa jiiçxa', iidx ũusteçxáa txãa sũhna mfxi'ze Dxus dxi'pte. Ewmeena sũhwa'ja's ũusteçxáa yuhwa yaakxsamée yakh yu', ew yuja'.

<sup>23</sup> Nawa ewmeewáana sũhna kuh jwed yajkxna ũ'sa yakha', ewmée yuja'. Txãa pa'gatey ewmeewáanakx sũhwa'ja's ji'phçxa nwěese'jmeete', txãa yu' pkal yuja'.

## 15

### *Vxitesa yakh ewçxáa yũuna fxi'zewa'ja'*

<sup>1</sup> Dxus yakh çxhãçxhayã'j fxi'zesa' peekxçxáa wět fxi'zewa'ja's pakwemée, pu'çxwa'j ji'ptha'w Dxus yakh fxi'zewa'ja's açxamée ew jiisatx.

<sup>2</sup> Kwe'sxa' teeçxsa na'wěçxah vxite nasatx pu'çxna wět kaafxixi'ze'jwa'j ji'ptha'w ewçxáa yũuna, txãawe'sxa' Dxus yakh jweeíçxáa çxhãçxha fxi'zeya' ãjakahn.

<sup>3</sup> Txãa pa'gatey Kristo txakwe jxtuhthesa yuhçxawa, peekxçxáa wět fxi'zewa'j yu'sa' pakwemée, wejxwa vxitetx wěesxuni's txãak jxpa'ga. Txã'sna we'weçxak Dxus librute na'jĩ': Idxna wěesxuni's adxthu jxpa'ga jĩ'k.

<sup>4</sup> Dxus librute fxi'jni ũsta' txã' kwe'sxtxi kçxhãaçxha'jwa'jsata', nxuswa'j en ma'wěsa pa'thewa nxusmée çxhãçxha yajkxna fxi'zeya' piyakahn.

<sup>5</sup> Nxuswa'j en pa'thewa çxhãçxha fxi'zewa'ja's Dxusku ũsu' na' txãái pu'çxhina puutx ewçxáa yũuna Kristo Jesus na'wěy fxi'zekahn,

<sup>6</sup> kxah kxteeçxah jxukaysa kwe'sxtxi jxpe'jsa Jesukristo Tata yuuçxá's tuuthe'jene'kwe.

*Judiu ji'jmée vxite nasatx Dxus yuwe's pta'sxni*

<sup>7</sup> Kristowa ma'wěga i'kwe'sxtxi jxpa'ga txã'wěy i'kwe'sxwa wa'lmée mpa'gawe maa yakthě'jtxwa, Dxus weçxakahn.

<sup>8</sup> Miiyajkxwe: Dxusa' kwe'sx yaçgawe'sx yakh puutx we'wek Kristo kiiwa'ja's, aça' txãa puutx we'weni kxtey yuukahnku Kristo' kîh judiuwe'sxtxi selpiiya'.

<sup>9</sup> Sa' judiu ji'jmée vxite nasawa Dxusa's jxpa'gaçxa weçxana tuuthe'khanku Kristo' kîh. Txã'sna we'weçxak Dxus librute na'jî': Txã'wě ew yũupa'ga txãawe'sx ksxavxyte idxa's weçxana memna tuuthe'je'nja jî'k.

<sup>10</sup> Sa' vxite ajkhěwa na'wěk we'we': Judiu ji'jmée vxite nasaçxawa judiuwe'sx yakh ja'daçxah wětwět miiyajkxwe jî'k.

<sup>11</sup> Sa' vxite ajkhěwa pta'sxi' íiçxáak: Judiu ji'jmée vxite nasa jxukaysawe'sx Dxusa's weçxana mtuuthe'jwe, Dxusa' seena' yuh walasa' jîna nasa jxukaytxi pta'sxna.

<sup>12</sup> Txajíiçxáak Isaiaswa na'jîna fxi'j: Jesé ji'j teeçx kasejena, judiu ji'jmée vxite nasatx jxuka yamuya'.

Aça' txãawe'sxa' nwe'wenisa yuutxna jî'k.

<sup>13</sup> Kwe'sxtxi nwe'wesa Dxusa' i'kwe'sx ũuste wětwět weçxana fxi'zewa'ja's ũsuna txã'sna

jxpa'gasatxi's, kxah Dxus Espiritu pu'çxte', Dxus nwe'wenisatha'w yuu sũhna weçxana fxi'zene'kwe.

<sup>14</sup> Adx yakhthẽ'jwe'sx, adxa' ew jiith i'kwe'sxa' ew yũuwa'j yuuçxá's ne'kwe ũuste ji'ph fxi'ze', ma'wẽ yũuwa'ja'swa sxiigmée. Txãasa ne'kwe teeçxsa na'wẽçxah puutx ew ya'yu'kxpehna fxi'ze' sũju'th.

<sup>15</sup> I'kwe'sxa' txã'wẽyã'j sxiigmée fxi'zesa ne'kwe, nawa adxwa fxii yu'kxpehna fxi'jaçthu Dxus yakh wejx ew fxi'zewa'ja's kaajiyu'jna.

<sup>16</sup> Txã'wẽ yũuwa'ja's Dxusku adxa's neewe'weçxa nvxiht, judiu ji'jmée vxite nasatx Jesukristo kaapiya'jni's pta'sxkahn. Txãa Jesukristo kaapiya'jnisaí Dxus yuwe ewte nvxiitwa'jsa' txã'snath adxa' pta'sxi', judiu ji'jmée vxite nasaçxawa Dxus Espiritu pu'çxte', Dxusa's jiyuçxa ewte neeyũukahn.

<sup>17</sup> Txãasath adx ũuste wẽtwẽt yaaki', Jesukristo kaapiya'jni's pta'sxna Dxusa's selpi'th sũhna.

<sup>18</sup> Nawa txã'wẽ yũuwa'ja's Kristok adxa's pu'çx judiu ji'jmée vxite nasaçxawa Dxusa's nwẽese'khan, txãawe'sx ew jiyukahn yuwejuwa pta'sxna, kim yuhwa ãjanimeesatx ãatewa kaavxya'ja'jnik yuu Dxus Espiritu pu'çxte.

<sup>19</sup> Txã'wẽ yũunath Kristo yuwe ewte nvxiitwa'jsa's mtee mteewa pta'sxna jxã'j, Jerusalente takhçxa Iliriko kiwete pa'phkaçx.

<sup>20</sup> Txã'wẽ vxite pta'sxnisu yu' pekũjxa'meeth yajkx, wejxwa bagaçxteçxáa yuhwa Kristo yase's kxsusnimeesuth txajx yuwe ewsa's pta'sxya' yajkx, Dxus librute na'jĩ'k txãa kxtey yuukahn:

21 Txãawe'sxa' bagaçxteçxáa yuhwa  
 Dxus yuwe's pta'sxni meesaçxawa,  
 wêse'jetxna,  
 Sa' jiyutxna, bagaçxteçxáa yuhwa  
 jiimeesaçxawa jĩ'k.

*Pablo Roma çxhabna u'jya' yaakxni*

22 Txã'wê Dxus yuwe's kaapiya'jna u'juçxath  
 i'kwe'sx tasxna yujxa' yu' tudu'çmêe, maz uswa  
 yujxa' yajkçxawa.

23-24 Nawa açxha' naa ja'dasu pekũhna jxã'th  
 na' Espanxa kiwen u'jweççxa', i'kwe'sx tasxsuwa  
 iipa'j uykhêu'nja txã'wê yũuwa'ja's nyafxiith  
 yaakxni ji'phu'. Aça' i'kwe'sx yakh pkhaakhena  
 ũsçxa Espanxa kiwen u'jweçte', pu'çxhine'kwe  
 sũju'th.

25 Nawa açxhíu yu' Jerusalenna u'jweçthu kxtee  
 yakthê'jwe'sxtxi kĩhçxáawa pu'çxwa'j jxũna.

26 Jerusalente yakthê'jwe'sx kĩhwa  
 ji'phmeesa ũsta' txãawe'sxtxi pu'çxya' jĩçxa  
 vxyuu pkhakhtxi Macedonia vxite' Akaya  
 kiwesuwe'sx txã'sna jxũna u'jweçthu.

27 Txã'wê pu'çxte ewna sũhwa'ja's  
 ji'phutx, txãa pa'gatey isa ew yajkxte yu'  
 Macedoniasuwe'sxa' yuultxi yu', txã'wê judiu  
 ji'jwe'sxa' Dxus yuwe ewsa's jxtxuhdetx judiu  
 ji'jmêe vxite nasatxwa. Txãa pa'gatx Dxus  
 yuwe ewsa's kwe'sxtxi pta'sxpa'ga ka'tuwa  
 kaasxwedu'jwa'j ji'ptha'w jĩçxa txãawe'sx  
 ji'phunisa yakh pu'çxya' yajkx.

28 Aça' txã'wê Jerusalente pa'jçxa' pkhakhni  
 vxyu's txãawe'sxtxi dukhçxa', Espanxa kiwen

u'jya'wath, txãasa i'kwe'sx tasxsuwa dudte ne'ka'nja.

<sup>29</sup> Adx i'kwe'sx tasxte pa'the', i'kwe'sxa' jweeíçxáa Kristo yakh çxhãçxha fxi'zene'kwe sũju'th.

<sup>30</sup> Yakthê'jwe'sx, i'kwe'sxtxith neewe'we': peeygãawa'ja's Dxus Espiritu ũste ji'phi'kwe, txãasa adxa's peeygãhçxa Jesukristo's pi'kxçxa adx pa'gate Dxus yakh puutx we'wekahn.

<sup>31</sup> Judea kiwete açesa ũsta' txãawe'sx adxna kîhwa ewmée yũukahmén Dxusa's mpi'kxwe, sa' Jerusالente yakthê'jwe'sxtxi pu'çxwa'j jxũna u'jweçthu txã'snawa weçxana jxpa'gakahn,

<sup>32</sup> kxah Dxus pu'çxte', ewçxáa ki' sxawedçxa i'kwe'sx yakh weçxana ũswa'ja's ji'phu'nja.

<sup>33</sup> Dxusa' i'kwe'sx jxukaysa yakh pi'kxna nes yuuna, ewçxáa kaafxi'ze'jna.

## 16

### *Nasa iisa yuwe weçxaa kaahni*

<sup>1</sup> Kwe'sx npe'sx Fxebe pa'the', txã'sa' wa'lmée jxpa'gakahn neewe'weçthu i'kwe'sxtxi, txã' Cenkreá çxhabte pkhaakhesatx selpiisa'.

<sup>2</sup> Txãa pa'gatey Dxusa's jiiyã'jsa' ma'wē yũuwa'ja'swa jii i'kwe na' txã'wēçxáa yũuna mpa'gawe, Kristo's selpiisa' naa pa'ga kwe'sx npe'sxna sũhna. Sa' txãa kîh peejini'swa mpu'çxwe, txãa pa'gatey txã' maatxwa wala pu'çxsa' txãasaíik adxnawa pu'çx.

<sup>3</sup> Priscila vxite' Akila txãawe'sxtxi yuwe mweeçxawe, Kristo Jesusna adx selpiçte', txãawe'sxa' kxtee adx yakh mjii pu'çxsatx yu'.



4 Txãasaíitx txãawe'sxa' u'dxih adxna nwe'wena. Txã'wě ew yũupa'gath adxa' txãawe'sxtxi' wala weçxá'. Nawa adxçxáa txã'wě weçxa'çméeth, judiu ji'jmée vxite nasawa weçxa'tx Dxusa's jiisawe'sx.

5 Priscila vxite' Akila txãawe'sx yatte pkhaakhesa yakthě'jwe'sxtxiwa yuwe mweeçxawe. Sa' adx namiku Epeneto'swa mweeçxawe. Txãak nyafxçxah Akaya kiwete Kristo's ũuste jxpaga'sa yu'.

6 Maria'swa yuwe mweeçxawe, txã' nakwe wala mjïik i'kwe'sx ksxavxyte.

7 Adx ji'j Adróniko vxite' Junias txãawe'sxtxiwa yuwe mweeçxawe. Txãawe'sxa' adx yakh karcelte ũssata', sa' Dxus yuwe's pta'sxya' kaahnisawe'sxtxi yu', thaakwe jiyunisa. Sa' txãawe'sxa' Kristo's jiisayã'jtx yu' Kristo's adx jiyumeyna.

8 Kristo's jiisa adx namiku Ampliasnawa yuwe mweeçxawe.

9 Kwe'sx na'wěy Kristo Jesusa's selpiina fxi'zesa Urbano'swa yuwe mweeçxawe, vxite' adx namiku Estakisnawa txã'wěy.

10 Apelesnawa yuwe mweeçxawe, txã'sa' makwě nxuswa'j en pa'thewa, Kristo yakh tx-utemeek fxi'zesa yu'. Sa' Aristobulowe'sxtxiwa txã'wěy yuwe mweeçxawe.

11 Adx ji'j Herodiana'swa yuwe mweeçxawe, vxite' Narciso ji'jwe'sx Kristo's jiisatx yuwe mweeçxawe.

12 Trifxena vxite' Trifxosawe'sxtxi yuwe mweeçxawe, txãawe'sxa' Kristo's selpisaatx yu'. Sa' kwe'sx npe'sx Persidanawa yuwe

mweeçxawe, txãawa wala mjïisa yu'k Kristo's selpiina.

<sup>13</sup> Rufxusnawa yuwe mweeçxawe, txã' wala jiyunisa yu'k Kristo's nwēese'jsa' jïni, sa' txajx nji'ja'swa yuwe mweeçxawe, txã' adxna jxpe'jsa mama na'wēsak yu'.

<sup>14</sup> Vxite' naawe'stxxi yuwe mweeçxawe: Asinkrito, Fxlegonte, Hermas, Patrobas, Hermes, vxite' yakthē'jwe'sx txãawe'sx yakh ũssayã'jçxa.

<sup>15</sup> Vxite' naatx yuwe mweeçxawe: Fxilólogo, Julia, Olimpas, Nereo vxite' txajx npe'sxna. Sa' txãawe'sx yakh ũssa Kristo's jiisa yuutxi' jxuka mweeçxawe.

<sup>16</sup> Teeçxa na'wēçxah ũuste wala wēt yajkxna puutx yuwe mweeçxawe. Sa' Kristo's nwēese'jsa mteewa pkhaakhesa yu' jxukaysatx yuwe weçxaakaja'.

<sup>17</sup> Yakthē'jwe'stxxi neewe'we'th, i'kwe'sxa' wala mpa'yajkxwe na'wē ew fxi'zewa'ja's piya i'kwe txãajũ kaypuba'jna kaapui'jna fxi'zesatx. Txã'wē yūsawe'sx yakha' mtxuteewe.

<sup>18</sup> Txã'wēme', txãawe'sxa' Jesukristo's selpiisameeta'. Txãawe'sx ewmée yaakxniçxá'stxi kxtey yuuna fxi'ze', sa' nasa açxamée ew jisa yuutxi'sa' kaypuba'ja'tx wala zhiçxkweçxáa we'weçxa.

<sup>19</sup> Kristo kaapiya'jni's i'kwe'sx ũususuh jxuka nwēese'jni's jxukaysa jiita', txãa pa'gath adxa' weçxá'. Sa' ewmeesa yu's nwēese'jmée wejxwa ewsaçxá's nwēese'jna ũskahnthu neewe'we'.

<sup>20</sup> Aça' kïhtewa jxuka ew kaafxi'ze'jsa Dxusa' i'kwe'stxxi pu'çxhina eçxthē'j knaykahmén. Aça'

i'kwe'sxa' Jesukristo yakhçxáa mfxi'zewe.

<sup>21</sup> Adx yakh mjii pu'çxsa Timoteowa yuwe weçxaakaja'k, vxite' Lucio, Jasón, Sosípater adx jii'jwe'sx.

<sup>22</sup> Naa karta's fxi'phu'çxsa Tercio adxwa yuwe weçxaakaja'th Dxus yakh fxi'zesatx.

<sup>23</sup> Sa' Dxus luuçx pkhaakhewa'j yat pki'jsa Gayowa yuwe weçxaakaja'k, adxa's paadee yat pki'jsa. Vxite' Erastowa yuwe weçxaakaja'k, gobierno vxuyu's jxaawsa. Txã'wëy kwe'sx yakthë'j Kuarto yaasesawa weçxaakaja'k.

<sup>24</sup> Kwe'sxtxi jxpe'jsa Jesukristo pu'çxhina i'kwe'sx jxukaysatx bagaçxtewa.

*Dxusa's yuuçxáa weçxani*

<sup>25</sup> Æçha' Dxus kusete nvxiituçthu txã' i'kwe'sxtxi jweeiiçxáa çhãçha kaafxiz'e'jena, Jesukristo kaapiya'jni's ma'wëtka pta'sx txã'sa' kxtey yuuna. Kwe'sx ewte neeyüuwa'ja's naa kiwemeeteyku Dxusa' pheu'jçxa jii'phu',

<sup>26</sup> nawa txã'sa' jü'nasuçxáak kaajiyu'jni yuu, Dxus yuwe pta'sxsawe'sxtxi kaafxija'jçxa. Txã'sna æçha' maa kiwetewa jxuka pta'sxni yuuça', maawa Kristo's üuste jxpa'gaçxa nwëese'khan. Txãa pa'ga Dxusa's wala weçxaawa'j jii'ptha'w.

<sup>27</sup> Dxus yuuçxáa ma'wë yüuwa'ja'swa jxuka jiisa'. Txãa pa'ga txã's yuuçxáa bagaçxtewa weçxana nes yuuwa'ja', kwe'sxtxi nwe'wesa Jesukristo ew yüupa'ga.

**Dyus Yuwe U'sesa**  
**Páez: Dyus Yuwe U'sesa New Testament**

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 18 Apr 2025 from source  
files dated 29 Jan 2022

06da09f4-8d0f-5001-ae8c-0e6aa0131ffd